



FA'AFEILOA'IGA

Aukuso 2020

E fa'atalofa atu i le pa'ia maualuga o le tatou Kapelania, le afifio o le Ituaigasā, le mamalu i le Aiga a Sagato Iosefo i susuga i Fesoasoani ma a latou Faletua, le afifio o Peresetene o Ekalesia ta'itasi ma o outou ofisa, le paia i Tupu ma Tamali'i, Tulatoa ma Paleupolu tofi, Faletua ma Tausi fa'apea le pa'ia i Ekalesia ma mafutaga ta'itasi a le tatou Kapelania. Malo le onosa'i malo le tauata'i. Ua toe amatalia le tele o galuega fa'apea a'oa'oga ma nisi o faiga masani o le olaga sa tatou i ai ae le'i tapunia Niu Sila ona o le fa'ama'i sa a'afia ai le tele o nei vaega o le olaga e potopoto ai le to'atele. O lea ua toe tau amatamata mālie nisi o a tatou galuga e pei ona masani ai ae o lo'o lapata'i mai lava ina ia faia ma le fa'aeteete ma le alofa ina ia maua pea le saogalemū mo tatou ta'ito'atasi ma aiga fa'apea tagata laua'itele.

O se avanoa tāua fo'i ua maua e toe fa'aauau ai nisi o 'au'aunaga e pei o le tatou pepa o le Taulogologo. Ae le'i tapunia Niu Sila e pei ona amata mai ai ia Mati ua uma ona tapena nisi o tusitusigamo le lomiga mo Aperila ae na lē fa'ataunu'uina ona o le tapunia o Niu Sila, ma o lea ua fa'aauau lava ona fa'ataunu'u

Le vaitau a o feagai i tatou ma le tapunia o le atunu'u, o se tasi o atamai laulioa o Moseniolo Tomasi Halik sa lapata'i fa'apea o le tapunia o falesa mo se taimi lē mautinoa ona o le fa'ama'i o le Covid 19 e ao ona va'aia o se taufagufagu ma se tauvala'au ia toe silasila lelei i le lumana'i o le Fa'atuatuaga Katoliko. Fai mai o ia o le tele o falesa o le a tapunia i se lumana'i e lē toe mamao atu – e lē ona o ni mafua'aga mai fafo atu e pei o le fa'ama'i o lo'o pipisi nei, ae ona o le musuā e fa'afou.

"E le'i lapata'i ea i tatou i le tuputupua'e o atina'e fou i le tele o atunu'u o lo'o fa'asolosolo ona leai nisi i falesa, monaseri ma seminalio ma i'u ai ona tapunia nei nofoaga?

O le fa'ama'i o le COVID – 19 na mafua ai le tele o le puapuagatia, fa'aleagaina ma le fa'anoanoa ua fa'ailoa mai ai le mataupu o lo'o fa'amamafa mai e le Laudato Si. "O se mala ua a'afia ma sosolo ai le fa'aletonu i le lalolagi atoa" fai mai ai le failautusi aoao a le Caritas o Aloysius John (Me aso 16).

E lē o le "sauniuniga mo le lumana'i" ae "o le sauniuniga o le lumana'i"

Ia Me le aso 24, 2015, na sainia ai e le Pope se poloa'iga ma na talia ma le fiafia tele e le 'au fa'atuatua ia lunu 18.

Sa ia fa'amanatu mai lava pea o se poloa'iga "fa'asosaiete" i lo se tusi tau "fa'asi'osi'omaga". O le mafua'aga lea na fai mai ai se tasi o Katinale o Peter Turkson e maua i ai ni ta'iala e fesoasoani e tapena ai le lalolagi mo se "lalolagi i le mae'a" mo ni mala pei o le fa'ama'i o lo'o i ai nei.

O le talanoa i le atoaga o meaola ma le si'osi'omaga ua tatounofouta ai i le 'tagi a le 'ele'ele', ae o le COVID – 19 ua fa'amanatu mai ai fo'i le mana'omia ona fa'alogi i le tagi a le 'mativa', latou uma ua vaivai ma a'afia gofie i fa'ama'i. Fai mai Katinale Turkson i se latou fonotaga ma Pope Faranisisi sa saunoa ai e fa'apea e 'sauniuni le lumana'i' ae lē o le 'sauniuniga o tatou mo le lumana'i', ae ia sauniuni ma fa'atalitali. O lenei fa'afitauli o se avanoa e lē tatau ona fa'ama'imauina i le mafaufauina i se lumana'i e sili atu.

"O le taimi mo se liliuga loloto fa'asi'osi'omaga a le lalolagi"

O se manatu e mafuli tele i ai le Vatikano o le fa'asusulu lea o le malamalamā i mataupu 'ese'ese na aumai e le vevesi ma le fa'aletonu e le COVID – 19 ua iloa ai nei le fa'aletonu o tapenaga ma le leai o se galulue fa'atasi o le lalolagi. Mo se fa'ata'ita'iga, o le oge ma le fia 'a'ai i le lalolagi. O lenei fa'ama'i ua fa'ateleina ai le fa'afitauli tau mea'ai. E ui ua aumai e lenei fa'ama'i le ma'ema'e o tulaga tau i mea'ai, ae o se avanoa fo'i mo suiga, i le gaosiga ma le fa'aogaina, i faiga ta'ito'atasi ma gaioga laua'itele.

'Aua le tu'ua'ia malosi'aga mai fafo mo falesa ua gaogao.

"Aisea ua tatou tu'ua'ia ai lava nisi o malosi'aga mai fafo e pei o 'sunami o le vavae'eseina mai o mataupu tau le Malō mai mataupu tau le Lotu' i lo le fa'ailoa aloa'ia o le isi vaega o le tala'aga o Kerisiano ua fa'asolosolo ona taunu'u ma ua tatau ona-sauniuni mo le isi vaega"

O Halik na fa'au'uina ma ositaulaga i le 1984 i le vaitaimi a o avea Czecsklovakia ma setete komunisi, ma sa fai mai o ia e tatau i le Ekalesia ona avea e pei ona mana'o i ai Pope Faranisisi, o se "falema'i i le malae". "O lo'o fa'apea mai Pope Faranisisi e lē tatau i le ekalesia ona solomuli mai se lalolagi o lo'o mafanafana i le 'matagofie o le tuto'atasi' ae ia alu atu ina ia pā'ia ona tua'oi ma muta'aga ma fesoasoani atu iā i latou o lo'o mafatia i le tino, le mafaufau, fa'asosaiete ma le fa'aleagaga."

Fa'atasi ai ma isi vaega, o lenei o le a amataina se togisala mo lea

AFIOGA KATINALE JOHN DEW



UŌ PELEINA

O le aso Tofi, 11 o luni na fa'amanatu ai le Sulufaga o le Apostolo o Panapa. O le Tusi faitau muamua o lenā aso o le Galuega a le 'au Apostolo . O se vaega o le faitauga na fai mai:"**Ua logo atu le tala i ia mea i taliga o le eklesia o i Ierusalem; ona 'a'au atu lea e i latou iā Panapa, ia alu atu o ia ma ua iloa le alofa tunoa o le Atua, ona olioli lea o ia,...**"(Galuega 11: 22 – 24)

Mo ni mafua'aga e lē mautinoa i lenā aso, o nei upu na fōtua'i mai ma na amata ai ona ou tomanatu i ai. Sa ou fesili iā a'u lava e fa'apea, afai ou te feagai atu i ni tulaga 'ese'ese e tula'i mai fa'apea ni tagata 'ese'ese e i ai se 'ese'esega o le a tula'i mai pe afai ou te taumafai e sa'ilipō'o fea na avatu i ai e le Atua le kalasia? Sa mafai ona ou va'ai ma taumafai e iloa le lelei ma manatu ifo o lo'o i ai le Atua i'ina ma o galue ai? E fesoasoani lea e maua ai se

loto fiafia iā te a'u? E foliga mai e fa'amalosi'au i le manantu ua iloa atu le kalasia a le Atua o lo'o galue, ma ua ou fiafia ai i lea faiga.

O gaioiga ma uiga a Panapa na avea ma lesona tāua mo a'u. Sa ou iloaina mo se taimi umi lava e iā te a'u le matafaioi e taumafai ai e faia ni suiga i la tatou lalolagi nei. Ou te iloaina e lē tatau ona 'ou nofoa'i ma fa'atalitali mo isi e faia lenei suiga.Ou te iloaina fo'i, e ui i lea, e mafai ona tatou lagolagosua ma fa'amalosi'au i isi. O le mea lea ua ou fa'asoa atu ai ni mafaufauga e pei ona ta'ua i luga i lenei vaiaso. A mafai ona tatou va'ava'ai ma iloa ua tu'uina atu e le Atua lana kalasia o le a fa'atupulia le filemū ma le fealaofani i la tatou lalolagi nei.A tatou va'aia le kalasia a le Atua o lo'o galue i tagata uma lava, po'o le ā lona lanu, talitonuga, tausaga o le matua, atonu o tatou, e pei o Panapa, o le a fiafia, e lē ona o mea ua tatou faia, ae o mea ua faia e le kalasia a le Atua. O le tele o fiafiaga iā i tatou o le a fa'apea fo'i ona fa'ateleina le agaga o le fa'afetai .

Ma Fa'amanuiaga Uma Lava

+ Ioane

2

FA'AALIGA MO OSITAULAGA MA TAGATA LAUA'ITELE

O se fa'aaliga mai lana afioga ia Katinale John Dew i le toe tatalaina o falesa ma amatalia lotu ma isi galuega ua mulimulita'i i fa'atonuga ma apuapua'iga mai le Malō fa'apea le Ofisa o le Soifua Maloloina ma nisi tu'utu'uga mo le alualu lelei i luma o le saogalemū ma le soifua maloloina lelei laua'itele o tagata. O lea ua mae'a se fonotaga ma lana Afioga ma ua aumai ai se fautuaga mo le toe amatalia o a tatou galuega fai ma ua fa'apea mai, "O lenei ua tatou taunu'u i le Tulaga Tasi ma ua talosagaina tagata e tusa ai ma faigā sauniga i le pirota ua fou mai. O le mea muamua e talosaga atu ai, IA SAOGALEMŪ; e ao ona atoatoa lou soifua maloloina ina ia mautinoa ai i latou o lo'o e 'au'auna atu i ai ia tumau pea lo latou soifua maloloina lelei. O le fautuaga mai le malō a o tatou i ai lenei pirota ua fa'a'autū lea i le tausia o le tu mamā ua a'afia ai le tausia lelei ma fa'amamā mea uma.,

Fa'amamā mea uma ua tagofia.

Fufuluina o lima i le fasimoli ma le vai ia fai so'o (mo le 20 sekone), ma ia fa'amatū lelei ma tu'u sa'o le pepa solo i le lapisi.

Tale pe mafatua i totonu o lou tulilima pe ufiufi lou fofoga ma lou isu i se pepa solo. Tu'u sa'o lava i se ato lapisi.

O luga o le tele o meāfale e mafai ona to'a ai to'uluga o le fa'ama'i.

Solo fa'amamā so'o luga o meāfale e a'afia ai vaega e tagofia so'o e pei o 'au o faitoto'a ma telefoni

E ao ona maitauina e lē o mau tonu lava tagata e uiga i o latou saogalemū ma tatou te lē manana'o e avea lea ma se avega mamafa mo latou i le o mai i le Misasa.

FA'AFEILOA'IGA

tulaga, se'ia talu ai nei, i le tu'u avanoa i ona suli i amioga na fa'aleagaina ai tagata – e o'o ia i latou e le mafai ona-pupuia i latou lava.

Sa'ilī o Mafua'aga ma se Fofō, Tui Pui-puia ma le Tausi ia toe malosi

E le gata i le ofoina o fesoasoani fa'afoma'i, fa'asosaiete ma le alofa – e pei ona faia talu mai lona fa'avaeina – e tatau i le Ekalesia ona malaga tele atu i luma. E pei o falema'i lelei uma, e tatau ona ofo atu se sa'iliga o mafua'aga ma se fofō o le ma'i. O le iloa tinoina o fa'aaliga o taimi e a'afia ai ma le ituaiga o "vailau e puipuia" e fa'asinotonu i le puipuia o le sosaiete mai le fa'ama'i o le fefe, itagia, fa'asesētagata ma le-taufa'aleaga.

Mulimuli mai ai e tatau ona a'afia ai ma le "toe fa'aleleia" – lona uiga o le fa'aleleia o le fa'aletonu mai mea ua tuana'i e ala i le fa'amagaloga. Fai mai se mau, o falesa ua to'agaogao nei ona o le fa'ama'i o le Covid 19 o se fa'ailoga ua fa'aali mai ai ia i tatou le tulaga ole lumana'i pe afai e lē tu'uina atu e le Ekalesia i le lalolagi se ituaiga o Fa'akerisiano ua suia.Ua manatu tele i tatou o le lalolagi – o "isi" – e tatau ona liliu. Ma ua tatou lē manatu lava ile mana'omia o tatou lava ona tatou liliu. Ae lē na o lenā. Ua le gata ua tatou lē manatu pe fa'apefea ona fa'aleleia i tatou lava, ae o le manatu maualuga pe fa'apefea ona avea ma Kerisiano e talia faiga ma ni mea fou i lo le tumau ai pea i faiga ua "masani ai". Ua i ai se manatu ia tatou

fa'aogaina le taimi na mavae atu nei, na tapunia ai falesa ona o le fa'ama'i, e mafaufau loloto ai e uiga i suiga o le Ekalesia. E le tatau ona toe fo'i i se lalolagi ua mou atu po'o ni nai suiga o tulaga o lo'o i ai nei. Ae e ao ona loloto ni fa'afouga ua aga'i tonu i ai le fe'au autu a le Evagelia, "le talafeagai o lo'o fai mai so'o ai Pope Faranisisi."

Latou e sa'ilī le Uaina Fou

Fai mai se tasi o su'esu'e, o le va'aiga i le lalolagi nei o le aofa'i o latou o lo'o-mafana pea i le talitonuga ma tu masani ai ua mou malie atu. E fa'apea fo'i le numera o le 'au lē fa'apaupau mautinoa.Ua tuputupu a'e pea le fuainumera o latou o lo'o "saili" ma latou e leai ma se mafaufau i mataupu tau talitonuga po'o lotu. O latou o lo'o sa'ilī e maua i le 'au talitonu fa'apea i latou e lē talitonu, latou "o lo'o fa'anaunau mo se punavai e fa'amalie ai lo latou galala mo se uiga tonu o le olaga." O le taimi a le 'au sa'ilī ua taunu'u. Ae o lona uiga e ao i le 'au Kerisiano ona fa'aliliu isi iā latou tala'iga. E le tatau ona tatou taumafai e 'liliu' fa'avavevave latou o lo'o sa'ilī ma noanoatia i latou i fa'ala-potopotoga ma muta'aga fa'ale-mafaufau a tatou Ekalesia. E le'i sa'ilīa e lesu le mamoe na leiloa ma taumafai e toe aumai i faiga fa'alelotu a lutaia sa ia silafaina ona sa iloa lelei e lesu sa mana'omia ni fagu fou mo le uaina fou.

O fa'apotopotoga Kerisiano, palisi, ituaiga ma vasega fa'alelotu ua tatau ona-taumafai ina ia 'ausia le sini e pei ona

ausia e le tele o a'oa'oga o aso nei – "o se a'oga o le Atamai e sa'ilī ai le sa'olo-toga i le finafinau ma ni mafaufuga loloto."

O se mana fa'amalologa mo lenei lalolagi ma'i e mafai ona tafe mai i motu o le fa'aleagaga ma le fefasoaa'i. 'Aua ne'i fa'agaloina ona fesoasoani mo latou ua matuiā le puapuagā mai lenei fa'ama'i.

E lē faigatā ona tatou va'ai i le fa'ale-tonu ole fa'ama'i na pipisi nei o le Corid 19 i se malamalamā'aga i tusitusiga a Pope Faranisisi i lana tusi laulioa o le *Laudato Si*. O Me le aso 16 – 24 natatala ai le vaiaso na ta'ua "Vaiaso o le Laudato Si" i le fa'amanatuina mai e lenei fa'ama'i o le Corid 19 o "mea uma lava e feso'ota'i", e pei ona fa'amanatu-mai e Pope Faranisisi i lana tusi -

Si'osi'omaga, soifua maloloina, tamāoiga, fa'aogaina, galuega ma le sosaiete...

O le mala o le Corid 19 ua fa'alauiloa mai ai le mea o lo'o fa'amamafa mai e le *Laudato Si*. O se fa'aletonu ua a'afia atoa ai le lalolagi. Ua talosagaina tagata uma ina ia fai alofa mo latou na a'afia i lenei fa'ama'i, pa'i atu i ai i le fa'amanafanaga ona o mafutaga ua motusia ona o le malaga a le maliu ma le oti.

Ia Manuia le Faimalaga atu i se Lumana'i saogalemū ma le manuia.

SAGATO MATINI 1—Pope ma le Maletile (malii 655)

Ina ua avea Matini ma Pope i le tausaga 649, o le 'a'ai o Constantinople na avea ma laumua o le malō o Byzantine ma o le Pateliaka a Constantinople o se ta'ita'i lotu pito sili le malosi i le lalolagi i Sasa'e. O le tauiviga na i ai i le Ekalesia inā taimi sa-fa'ateleina e le galulue fa'atasi o le tupu ma le ta'ita'i o le Ekalesia.

O se a'oa'oga e taofiofimau i ai Sasa'e, o lo'o tau'ave o Keriso e leai sona loto futiaifo fa'aletagata. E fa'alua ona tauave aloa'ia e tupu lenei mau. O Heraclius i le tusia o se fa'atulaga fa'afa'atuatua ma Constans 11 i le tineia o le tulaga o le tasi pe lua loto futiaifo iā Keriso.

I se taimi pu'upu'u talu ona nofoia le tofiga o le Pope (na ia faia e aunoa ma se fa'amausalīina e le tupu), na taloina e Martin se fonotaga i Lateran na iloiloina ai tusitusiga fa'alemalō, na tu'ua'ia ai le pateliaka a Constantinople ma le isi to'alua na muamua atu o Constans 11, i le tali atu, sa taumafai muamua e liliu tagata e tete'e atu i epikopo ma le pope.

Ina ua le taulau lea fa'amoemoe ma na taumafai e fasiotia le pope, na auina atu ai e le tupu fitafita i Roma e saisai Martin ma aumai i Constantinople. O Martin ua le atoatoa le soifua maloloina, e le'i taumafai fo'i e te'ea lea ma na fa'apea ai ona avea e fitafita ma tu'uina atu ai o ia i le falepuipui, sauāga ma fa'asalaga. E ui na fa'asala i le oti ma o nisi o sauāga ua fa'ataunu'u. Na lavea'ia Martin mai le fasiotia i le talosaga a Paulo na salamō, o le ta'ita'i a le Ekalesia o i Constantinople, o ia lava fo'i sa ma'i tiga'ina.

Na malii Martin i se taimi mulimuliane ai, o sauga ma leaga o le faiga na mafatia tele ai. O ia o se tasi o Pope mulimuli na fa'amamaluina o se maletile.

O UPU TĀUA E FITU A IESU INA UA LATA ONA MALIU

‘Ua ou tu’u atu le mamalu iā te oe i le lalolagi; ua ‘ou fa’umaina le galuega na e tu’uina mai iā te a’u, ‘ou te faia’ (Ioane 17: 7).

Ia tatou muamua ona silasila iā lesu, le taulaga mamā ma le pa’ia o lo’o fa’atuina i luga o le la’au o le Koluse, i le va o le lagi ma le lalolagi. O lona tino soifua, peiseaī e lē toe soifua, auā tatou matamata i ai, na o ivi, e lē toe foliga i se tino tagata ae meā – manū o le feta, aemaise lenei upu a Tavita: A o a’u, o le tuga lava a’u, ae lē se tagata; ua fa’alumaina a’u e tagata, ma inosia a’u e le nu’u! (Salamo 22: 6)

O lesu, le Tamā agalelei ma le agaalofa. Pe totoe ‘ea se alofa o lesu mo lenei lalolagi agasala? E toe ea se alofa i Lē ua fasia, i lē ua tuimomomoina lona tino? E tatau ‘ea? E tusa pe toe alofa mai, a ua ‘ese lona fa’aleagaina e le vao tagata. Soia le toe tepa mai. Ua lava aso sa tepa alofa ai iā tatou ma foa’ifuaina kalasia a la ma lona Tamā. Ae leai, e leai lava. E le’i uma le alofa o lesu, ua mutimutivale lona alofa i tagata. O lesu o le a maliu, o le a fai lana mavaega i ni upu tāua. E ao ona e fa’afoga i ai, auā e ‘ese fo’i nei upu e māvae ai, peiseaī ua fa’aagaga upu o le ola.

Lo’u Ali’i e, inā e fetalai mai ia, auā o lo’o fa’alogologo lau ‘au’una.’

Le lalolagi e, afai ua e fa’afogaga i le sī’ufogaga o le Atua, ‘aua e te fa’amaa’ lou loto.

O aso o lona soifua sa apoapoa’i so’o ai lesu i tagata, ia fa’amagalo le tagata i ona fili, i e ua agaleaga mai, ia tatalo fo’i mo latou uma: ‘Ia e fa’amagalo fa’afitū ni fitu.’ Ua a’o’oina le tatalo i le au so’o, ae i lenā tatalo ua momoli atu ai le tagi i le Atua le Tamā: ‘Ia e fa’amagalo mai iā te i matou e pei ona matou fa’amagalo atu i e ua agaleaga mai iā te i matou.’

Le alofa moni, ma le telē, ma le tumau. O le a le uiga o o tatou fili, ma nei fili ua fa’asaga tau iā lesu? I le ma lenei, o a mea na latou tautala ai, ma amio vale ai iā te i tatou, pe a fa’atatau ma upu leaga ma amio vale a ē na laulautū i le itulā o lona maliu. Ua sili le ta’uleagaina o lo tatou Ali’i, le Tamā, a o ia o lo’o tumau le loto alofa mo i tatou uma. Ua agaleaga mai, ua agalelei atu, ua tatalo le Tamā i le lagi, ia fa’amagalo e ia i ō latou sesē.

E le gata fo’i i lea, e lē na tagi mo e ua sauā iā te ia i lona maliu, a o lo’o manatu fo’i ma tatalo mo e o lo’o sauā iā te ia i aso o lumanā’i, o tagata agasala ia.

Peiseaī o le tulaga o lo’o tu’u ai lesu, o le Koluse o lana lauga ua fai. O le lauga o le alofa. E mafai ea ona toe i ai se masalosalo i o tatou loto? O le mea ua fa’asino mai e lesu, ia tatou faia.

‘O le tasi fo’i o e na pagotatā ua fa’atautauina, ua upu leaga o ia i le Ali’i, ua fa’apea mai: *Afai o oe o le Keriso, inā fa’aoa e oe iā te oe atoa ma i ma’ua nei.* A ua tali atu le tasi, ua vavao iā te ia, ua fa’apea atu: ‘E te lē mata’u ‘ea i le Atua, ina ua tatou sala fa’atasi ma ia? Ua tonu lava la ta sala; a i ta’ua e tusa ma mea na ta faia; a o ia nei, e leai se mea e lē tusa na fai e ia. Ona fai mai ai lea o ia iā lesu: ‘Le Ali’i e, ia e manatua mai a’u, pe a e afio mai i lou mālō.’ Ona fetalai atu ai lea o lesu iā te ia: ‘E moni, ‘ou te fai atu iā te oe, o le asō ta te fa’atasi ai ma oe i Parataiso.’ (Luka 23: 43).

E to’alua pagotā, o le tasi ua inoino pea i le Atua, ma lafo upu tauaifai iā te ia. O le isi ua alofa ile Ali’i ma tagi atu iā te ia ma le salamō. Ina ua ta’u atu e lenei pagotā upu: Le Ali’i e, “ ua moli-mau e ia iā te ia, o ia ua talitonu ma ta’uta’u lona fa’atuua iā

lesu le Ali’i, le pule, le Atua. O le fa’atuua e fua mai ai le salamō moni, e fai ma olo o le fa’aoalataga o le tagata. Sa lauga atu lesu i le motu o tagata: ‘Ia outou salamō!’ E pei ona fai mai le tusi pa’ia: E sili le fiafia o le au agelu i se tagata e to’atasi ua salamō i nisi e to’atele ua amiotonu.’

O le upu a lesu e mavae ai fo’i iā te i tatou, e fa’ailoa mai ai le alofa silisili o lō tatou Ali’i. O la o lo’o tigāina lava mo tagata uma; o lo’o tigāina fo’i mo nei pagotā. Ua fa’amagalo i le tasi ona o le tele o lona alofa iā te ia ina ua salamō.

O lesu o lo’o tautau i le Koluse, o lo’o mana’o pe a i lenā Koluse, e mafai iā te ia e ona le mana uma ona alu ifo ma tu’ua lenā Koluse, a o lona finagalo, ia tigaina lava o ia, le agatonu, mo lē ua agasala.

O le pagotā ua salamō, ua tautau fo’i i lona la’au, ua na talia lenā puapuagā, e lē mana’o ia tatalaina lona tino, ua lagona lona sesē; e i ai ona tagi ma le fa’amoemoe atu iā lesu, le Atua le Tamā, ma ia avea lenā la’au ma ala e sao atu ai o ia i le malō o le lagi.

Ae peita’i, o le pagotā loto ma’ā’ā, ua fia alu ‘ese ma le la’au. E lē talia e ia lona tigāina, ua atili ai fo’i ona lafo upu taufāifāi iā lesu. O le mea fo’i lea na malaia ai le tasi, ae manuia ai le isi.

E ao ina tatou filifili lelei i o tatou loto, po’o le tigāina ma le loto salamō po’o le tigāina ma le muimui vale i le Atua. O lē salamō ma le onosa’i i puapuagā ua o’o i lona tino po’o lona loto, e manuia ai.

Sa tutū fo’i i autafa o le Koluse o lesu , Maria o lona tinā, ma le uso o lona Tinā, o Maria le avā a Keleofa, ma Maria Matalena. O lenei, ua silafia e lesu lona tinā o tu mai, ua fa’apea atu fo’i ma le so’o ua alofaina e ia. Ona fetalai atu ai lea i lona tinā: ‘Sena e, fa’auta, o lau tama lea,’ Mulimuli ane ua la fetalai atu i le so’o: ‘Fa’auta, o lou tinā lea.’ Ma talu ai i lea itu aso, ua avea ai o ia e le so’o e fai mōna.

O Maria o le tinā moni o lesu. O le tino e tasi ma le toto e tasi. O lesu o le Alo fa’apelepeleina a Maria. Pe fa’apefea ona tu’u mai lona tinā? O sē e lē alofa iā te ia? E leai lava, ua alofa i ai i se alofa fa’amaoni. A o lenei le itū e naunau ai i lona alofa. Ua silasila e la, o le a mātua oti i tatou, auā o le a maliu o ia. E i ai lana fetalai: ‘Sena e, o lau tama lea.’ Silasila i le upu; ‘Sena e.’ O le igoa lea e vala’au ai i le fafine. Pe se a le mea e le’i ta’u sa’o ai lona igoa tonu o Maria, po’o le upu – lo’u tinā e?

O lana mavaega ia iloa ai e tagata uma ua tu’u mai lona tinā e fai mo i tatou. O la o le a afio i le lagi pe a te’ā ni nai aso. O la o le ala, o le ola, o le upu moni. Ina ia tatou savavali i lenā ala, ma le lē fefe i se tasi, ina ia tatou maua le ola mai iā lesu ma fa’alogo lelei i le upu a lesu ua tu’uina mai i lona tinā: ‘Sena e, o lau tama lea!’ O lona uiga, sena e tausī lelei le tama lea auā o lau tama. E pei ona alofa iā te a’u i se alofa a’ia’i, ia fa’apea fo’i ona e alofa iā te ia. Fa’asino iā te ia le ala moni, ia ta’ita’iina ai o ia i le ala o poloa’iga ma ia nofo usita’i i le Atua.

A o oe loane, o lou tinā lea. ‘Aua e te masalosalo i ai. E te alu iā te ia, e pei o le fanau e o i le tinā, e te tautala i ai ma ta’u atu i ai mea uma, o ni mea e te fiafia ai, po’o ni mea e te fa’anoanoa ai. A tupu ni fa’alavelave ia e fa’alagolago i lou tinā lea.

Auā o lesu o lo’o silasila mamao mai. E lē na ona māvae mai mōaso o le soifuaga o Maria ma loane i lalo nei. A o le uiga tonu o lana mavaega, ua fa’asino lea iā te i tatou uma. O loane sa sui iā te i tatou, ina ua tu i tafatafa o le Koluse o lesu.

Ua tatou va’ava’ai i le meaalofa silisili ua foa’i mai e lesu mo le tagata. E ao ina tatou taofi ma toe fa’amauina lenei mavaega. O se mavaega taulia lea. Auā o le mavaega lea e fa’ailoa ai, e lē o

O UPU TĀUA E FITU A IESU INA UA LATA ONA MALIU

tatou o ni mātua otī; ae peita'i ua tatou manuia ona o lo'o i ai pea lo tatou Ali'i o lesu, ma lo tatou Tinā o Maria.

O le itū aso fo'i lea e iva ua alaga ai o Iesu ma le leo tele, ua fa'apea atu: 'Eli, Eli lama Sapatani' O lona uiga lenei: Lo'u Tamā e, lo'u Tamā e, po'o le a le mea ua e tu'ulafo'a'iina ai a'u?

Ua ūi ma le alaga ma le leo tele lesu. O lenā itulā ua to ai se mafui'e, ua fa'apogisāina le la, ua pouliuli lava le lalolagi. Ua lagona e lesu le tigāina tele. Po ua vaivai lona finagalo? E lē o lenā. I lona loto fuatiaifo ua fa'anoanoa, a o lona alofa fo'i ua ālai lenei tagi. O se tagi i le Tamā: 'Se a le mea ua e tu'ulafo'a'iina ai a'u?' Ua lafo'a'iina lesu e le Tamā, ina ia taunu'u le fa'ato'esega a le lalolagi agasala iā te ia. A tatou tigāina, ia fa'apea ona tatou 'ai'oi atu i le Ali'i. Ia tatou fesili atu i ai: o le a le mea ua fa'atigaina ai i tatou? Ua fa'atigaina i tatou ina ia tatou maua ai le ola moni. O le ola moni, o le ola e aunoa ma le agasala. O lo'o asiasi pea le Atua i tagata i lona agaalofa iā te i tatou. Sa fiafia ma olioli Sagato Paulo i aso sa tigāina ai i lona tino. Ia fa'apea fo'i ona tatou fiafia ma olioli pe a o'o puapuagatia ile tino po'o le loto. O le puapuagā o le ala tonu lea e uia e le tagata. Tautau ina savavali i lenā ala, ma fa'alagolago tasi i le Atua le Tamā. O ia e fai fo'i ma malosi'aga o le tagata.

Mulimuli ane ua silafia e lesu ua taunu'u mea uma, ona ia fetalai atu ai lea: "Ua ou fia inu." Ua taunu'u ai le valo'aga a Tavita, "Ua 'ou fia inu, ona avane ai lea o le vineka 'ou te inu ai."

O lesu ua fia inu, auā ua tele nauā le tigāina o lona tino, ua vaivai tele, ua umi itulā o ona puapuagā. E lē gata fo'i i lea, ua fia inu lesu ile usita'i i lona Tamā, ua fia inu i le tigāina pe afai ole finagalo lea ole Atua, ua fia inu fo'i i le agatonu mo le fa'aolataga o o tatou agaga. Se'i fa'apea ona tatou fia feinu: 'Amuia o e fia 'a'ai ma fia feinu ile agatonu, ona ma'o ona ai

lea i latou.

Ae peita'i o le to'atele ua latou feinu ma fia feinu pea i mea 'o'ona, ona o fa'aosoosoga e fiafia i ai i latou ma ua talia i o latou mafaufau sesē ma mana'oga vale, o mea ia latou te tu'uina atu i le Ali'i, ole agavale, ma le inoino i le Atua. Ua fa'apei o tagata lutaia. Ua tagi lesu i le fia inu a ua avane i ai le vineka. 'Ona momo'e ai lea o so latou, ua tago i le omo-mi, ua fufui ai i le vineka, ma tu'u i luga i le pito la'au, ua fa'ainu iā te ia, a ua fa'apea ane i latou uma, "Tu'u ai pea ia, se'i tatou iloa pe sau Elia na te fa'aolaina o ia." (Mataio 27: 48 – 49).

Ua inu le vineka e lesu, ona fetalai atu lea: "Ua uma." Ua uma! Ioe, ua tonu lelei lava, ua taunu'u mea uma; o mea sa tusia, o mea sa valo'ia e uiga i le soifuaga ma le puapuagā o lesu, ua fa'ataunu'uina. O le taulaga mamā sa poloa'i atu ai e le Tamā i lona Alo to'atasi, e lē tia'iina se mea e tasi. Toeitiiti ona maua ai lea e lesu lona mamalu. Ua toilalo fo'i lona fili. A o le tagata ua toetū i luga ma ua mafai ona toe savali.

O lenei fo'i le upu e tatau ona fai pe a o'o ile itulā mulimuli. Ae tasi le mea ina ia mafai e lenā upu, ia fai lo tatou olaga e pei o se taulaga mamā tatou te molia i le Atua. Fa'afogofa i upu a Sagato Paulo: 'Ua 'ou tau le tauri lelei, ua i'u iā te a'u le tausinoga, ua 'ou taofi i le fa'atuatua' (2 Timoteo 4: 7).

Ua o'o i le itū aso e iva, ona alaga ai lea o lesu ma le leo tele, ua fa'apea atu: "Lo'u Tamā e, 'ou te tu'uina atu lo'u nei agaga i ou 'a'ao!" Ua fetalai ia upu, ona to ai lea o lana mānava. Ua iloa e le ta'ita'i o le to'aselau le mea ua faia, ona vivi'i atu lea o ia i le Atua, ua fa'apea atu, "E moni, o le tagata amiotonu lenei" (Luka 23: 46 – 47)Kalolo Perez FKS....

O LE MATAGOFIEL O LE LAFOA'I O MEA UA TUANA'I: O LE SAISAIGA O ISA'AKO

Fa'aauau mai le lomiga talu ai)

O le i'uga e masalomia, ae o le tamā ma le atali'i ua noanoatia fa'atasi i la'ua. I le taunu'u ai i le nofoaga na fa'ailoa e le Atua iā Apera'amo, sa toe fa'atino e Apera'amo nisi o gaioiga a o aga'i atu i le taunu'uga o le tala. Ina ua taunu'u i le nu'u o Kanana, fa'apea na fausia e Apera'amo se fatafafaitaulaga i le aluna o Morē (12: 6 – 7), ae na ta'u mai iā i tatou e le'i faia se taulaga i lea mea. O i'inei i le mauga o Moria sa ia tu'uina fafie i le fatafafaitaulaga ma saisai Isa'ako. O le uiga 'ese o le fa'aogaina e le Tusi Pa'ia i le Kenese 22: 9 o le veape Eperuaqad (saisai) ua maua ai le igoa o le tala: o le 'aqad'po'o le saisaia o Isa'ako. Na tu'uina e Apera'amo le tama ua saisai i luga o le fatafafaitaulaga.

O le taimi tonu lea i le fa'aliliuga Aramaie ua ta'ua o le *Targum of Jonathan* ua fa'aofi ni upu fa'aopopo ina ia motusia ai le matuiā o le leai o se pisa i lea taimi. I le fa'aliliuga lea o le tusi Eperu na toe tautala ai Isa'ako: saisai fa'alelei a'u ina ne'i o'u gatete mai le tigā o lo'u agaga, ma lafo'aia a'u i le vanu o le fa'aleagaina, e maua ai le fa'aleagaina o lau taulaga.' O lea na mafua ai taufa'aooso mai le agelu i lugā: 'O mai ma va'ai i nei tagata e to'alu o lo'o fasioti le tasi i le tasi: o lē e fa'ao'o le fasiotia ua lē fa'atali a o lē e fa'asalaina ua fālō atu lona ūa. Ua tuputupua'e le fa'aletonu. Ile fuaiupu 10, ua 'a'apa atu le lima o Apera'amo ma tago i le naifi e fasiotia ai lona atali'i. O upu o lo'o fa'aogā e fa'amatala ai lea gaioiga e masani ona fa'aogā i le fasia o manu (Levitiko 4: 24 & 33).

O le vala'au a le ave fe'au a le Ali'i i le fuaiupu 11 o se fa'alua fa'apitoa: 'Apera'amo, Apera'amo,' ma le toe faia e pei i le fuaiupu 1, na tali Apera'amo 'O a'u lenei.' O le ave fea'u ua fa'aleoa upu a le Atua i le taimi tonu lenei o le tulaga faigatā, e pei ona vala'auina e le ave fe'au iā Akara fa'alua i ona taimi faigatā i le vaotu'ufua (Kenese 16: 7 – 12 & 21: 17). O le fa'aogaina o le igoa (YHWH) ua fa'aalia ai le lavelave o le tusitusiga o lo'o maua i ai vaega e lua o tusitusiga ua fa'amatala ai le Atua (Elohist ma le Yahwist).

O LE MATAGOFIE O LE LAFOA'I O MEA UA TUANA'I: O LE SAISAIGA O ISA'AKO

Ua fa'aalia mai o Apera'amo e 'mata'u i le Atua'. E fa'amuamua le Atua. Ua tu'uina atu e Apera'amo lona atali'i e alu, le atali'i o le folafolaga, ua leva ona fa'atalitali i ai, ua toe fa'amatalaina, o lou atali'i ma lou atali'i e to'atasi. E le'i alofia e Apera'amo se mea ua sili le pele iā te ia. E le'i taofiofiamau le meaalofa a le Atua. Ua toe tepa a'e ona mata, e pei ona i ai i le fuaiupu 4, ma o le taimi la lenei na iloa atu ai se mamoe po'a o lo'o lavelavea i le la'aufilifili. Sa fataulaga ile mamoe po'a i lo lona atali'i. Ua fa'atonuina o ia e ave lona atali'i mo le taulaga. Ua ia fa'ataunu'uina le poloa'iga na finagalo i ai le Atua, ona 'e iloa le Ali'i.'

O le fa'aigoaina o lea mea o le "E iloa le Ali'i i le mauga' ua toe manatua ai i upu fa'amafanafana a Apera'amo iā Isa'ako i le amataga o le tala: Lo'u atali'i e, e aumai e le Atua se tama'i mamoe māna e fai a'i le taulaga mū (v. 8). O le upu Eperu mole va'ai (ra'ah) o lo'o natia na fa'ailoa mai e Moria i le fuaiupu 2 o se nofoaga o faigataulaga. E tāua i le 2 Nofoaga-Tupu 3: 1 na fausia e Solomona le Fale ole Ali'i i le Mauga o Moria 'i le mea na fa'aalia mai iā Tavita lona tamā.' O se fa'aliga o lo'o tusia i luga o le Pa i Sisifo i Ierusalem o lo'o fa'apea mai: Afio mai i le Pa i Sisifo, se vaega o le Malumalu. O le Ma'a Fa'avae o lo'o i le tumutumu o le Mauga Moria. E pei o le mau a tu masani, o le lalolagi na foafoa mai le ma'a lenei, o le saisaiga o Isa'ako na faia i luga o le ma'a ma o le Tupu o Solomona na fausia fa'atamilomilo ai le ulua'i Malumalu i le ma'a lava lenei.'

O lo'o fa'amatala mai e le fuaiupu 14 igoa e lua o le mauga 'o le Ali'i nā te aumaia' ma le 'e iloa le Ali'i i le mauga'. Ua aumai e le Atua mea e fai ai le taulaga. Ua iloa le Atua ina ua tomanatu Apera'amo i le agalelei ma toe fa'afō'i atu i le Atua meaalofa sa ia taliaina.

O le tautalaga lona lua a le ave fe'au a le Ali'i (vv. 15 – 18) o lo'o fa'amanuia iā Apera'amo mo lona usita'i e le'i taofiofia o lona atali'i e to'atasi (vv. 12 – 16). O upu a lenei tautalaga o lo'o fa'aleoa mai isi folafolaga a le Atua iā Apera'amo. O le a fa'amanuia le Atua iā Apera'amo (12: 2 – 3). O le a matuā fa'ato'ateleina lava lana fanau e pei o fetū o le lagi (15: 5), o se fa'atusa sa toe faia iā lakopo i le 26: 4. O le fa'atusa o le oneone ile matāfaga ua toe faia iā lakopo i le 32: 13. O fa'aupuga nei o fa'amanuia mo le anoanoa'i o suli e tutupu mai iā i latou nei.

Ona i'u lea o le tala i le toe feiloa'i atu o Apera'amo i ana 'au'auna ma latou sa malaga fa'atasi atu i Peresepa. E lē o

ta'uā Isa'ako i le taimi nei. Ua suia le va feagai ai ma Apera'amo. Ua lē o toe 'saisaia' iā Apera'amo, ona ua tu'uina atu e Apera'amo e alu. O ia o se tasi o le kulupu e to'afā, e leai ni igoa e pei o tama e to'aluā, ua 'malaga fa'atasi' nei ma Apera'amo.

O le faitau fa'aleleia o le tusi o Kenese 22: 1 – 19 ua fa'apea mai e sesē pe ā a'afia se loto i le vaega lenei o le Tusi Pa'ia. O le tala ua talia'i fesili a le perofeta o Mika: 'Ou te tu'uina atu 'ea la'u ulumatua o la'u fānau totino e sui a'i le agasala a lo'u agaga?' (6: 70.) O lo'o tali mai le tusi e fa'apea: "Sole, ua fa'aali atu e ia iā te oe le mea lelei; se a fo'i se mea e finagalo i ai le Ali'i iā te oe pe a le o ia mea, ia fai le amiotonu, ia naunau i le alofa, ma ia foa'i mai lou Atua ma le loto fa'amaulalo" (6: 8). Ua iloa e Apera'amo le faimeatonu ma le alofa fa'atuatua a le Atua, ma savali fa'amaulalo, e ui lava, ae maise pe 'a lē manino le fete'ena'i i ala a le Atua. Ua faia e Apera'amo e pei ona fai atu ai le Atua. Ua o'o lava ona mana'ona'o i lona fa'atuatua ma le fa'amaulalo e toe avatu i le Atua meaalofa na taligā a le Atua.

O le tofotofoga o Apera'amo na fa'amausalā ai, e ui i le ulufia e faiga fa'apaupau i taimi o nofoa'iga a Aasa (2 Tupu 16: 3) ma Manase (2 Tupu 21: 6), o i latou o ē na mua'i fanau mai o le a toe fa'aolaina (Esoto 13: 11 – 16).

I lona fa'atulagaina o tagata o le fa'atuatua, o lē na tusia tuisia Eperu ua avatu vi'ivi'iga ia Apera'amo. O le fa'atuatua na alu atu ai Apera'amo. O le fa'atuatua 'ina ua tofotofoina sa ia ofoina atu Isa'ako' (Eperu 11: 17). Ua fa'amatalaina Apera'amo ua 'fa'atuatuaaina o le Atua e i ai le mana e o'o lava i le toe fa'atua mai le oti e pei ona ia toe mauaina mai.

Na tusia e Paulo: "O ia lava sa na lē fa'asaoina lona lava Alo, a ua tu'uina mai o ia ona o i tatou uma lava, e lē foa'ifua mai 'ea e ia iā tei tatou mea uma lava fa'atasi ma ia i se a? (Roma 8: 32). O le filifiliga o lenei faitauga mata'utia mo le Sauniga Afiafi o le Eseta ua fa'asino lea i le telē o le alofa o le Atua, o ia na foa'iina mai le Alo pele, e le'i taofiofi ia te ia mo ia lava. Ua fa'amanatu mai ai fo'i iā i tatou latou e pei o Apera'amo, talia le lu'itau o le koluse i le tele o 'auala. O tagata o le fa'atuatua, tagata e leai ni fa'atuatua, ua fa'ata'ita'i i le sauniuni a Apera'amo, ma fai mai, 'o a'u lenei!' I le Atua o misitelio, o ona ala e le o tatou ala. Ua fa'amanuiaina i tatou e faimalaga fa'atasi ma i latou...fa'ai'u.....

MISSION EXPO 2020 SAMOAN STALL, VIARD COLLEGE



O LE TOETU O LE TINO

O Kerisiano e talitonu i le “toetū o le tino”, e pei ona fai mai ai le Tatalo a Apostolo. O lona uiga o tino tagata uma lava – latou o Keriso ma tagata pa’ia, o lo’u tino, o lou tino, le tino o le tamaiti sulufa’i na tafea mai le matafaga, o le teneitiiti o lo’o tafaofao ile palā’au i le tuā’oi, o latou tou te alolofa tele i ai, o tagata ‘ese e te pasia i le ‘aula.

O le tele o Kerisiano e faigatā ona latou talia lenei mau. E masani ona tatou talitonu i se itua’iga o olaga mulimuli mai le otī, ae ua tatou māsiāsi i le gagana o le tino. E le’i talanoa mai ‘ea Sagato Paulo e uiga i le tino fa’aleagaga, *ae lē o fa’aleitino?*

loe ma le leai. E masani ona fa’aletonu i tatou ona o latou sa fa’aliliua le faitauga lea mai 1 Korinito 15. O le ‘ese’esega o lo’o faia e Sagato Paulo i le va o tatou tino e pei ona i ai i le taimi nei, ola i le olaga fa’anatura ua tatou fa’asoai ma isi manu, ma a tatou tino o le a i ai, tu’uina sa’o mai le ola e le Agaga o le Atua. I le faia o lea fa’atusatusaga, sa ia fa’aoga upu Eleni e lua: *psychikon* ma le *pneumatikon*. Masalo o se fa’aliliuga ua talafeagai o se sili atu le lelei “fa’ae’ega pa’ia ma le agaga” ma le “fa’ae’ega pa’ia ma le loto” Na te lē o fa’atusatusaina tino moni ma mea e lē o ni tino moni, ae o auala e lua ‘ese’ese o tatou tino ua ola ai, i le taimi nei ma aluā.

loe o se misitelio sili lenei. E pei ona fai mai le Katesimo ma le atamai, o le “fa’apefea” i le toetū fa’aleitino ona sili atu i lo tatou manatu ma le malamalamā’aga; ua na o le fa’atuatua ua mafai ai ona malamalamaina ai. O tatou mafaufauga ma malamalamā’aga na fausia i lenei lalolagi, o le mea lea e le mafai ona malamalamā’aga i le lalolagi o le a sau. Ae ui i lea, o le Atua i lona agamalū ua ofoina maia iā i tatou ni fa’atusa e galulue ai: o le tala a lo tatou Ali’i Toetū lava ia.

O ia lava lea e tasi ae ua ‘ese. Sa i ai sina taimi fa’atoā maitauina o ia – na manatu Maria o ia o le fai togālā’au, ma o so’o i le ala i Emau e le’i iloaina po’o ai se’ia o’o i le taimi na toe mou atu ai. Na fa’ali mai ma toe mou atu sa ia faia i ni auala misitelio. Ae ui i lea, ina ua latou iloaina o ia, sa le mafalalo lava, na o’o lava iā Tomasi i le i’uga. Sa latou iloaina o ia e ui i le suiga o lona tino, ae sa latou iloaina e ala i lenā lava tino. O lona tino lava. O ia lava lea.

Aiseā e afaina ai? Aiseā e lē talanoa ai loa i le “olaga mulimuli mai le otī” ae ‘aua le fa’anunumiina mea i ni a’oa’oga faigatā.

E i ai ona afaina, ona ua tatou talitonu i le Atua e Tasi, Lē na faia le Lagi ma le Lalolagi. Na te le’i faia ni lalolagi ‘ese’ese se lua, Natura ma le Agaga. Sa ia faia le lalolagi tasi. Ma na sau ma ola ai o se tagata. I tulaga fa’atagata ola, natura ma le agaga e so’ota’i i se ‘aula e faigatā tele ona vaevaeina. E ala i lo’u tino ua ou feiloa’i atu ai i le lalolagi, e ala i lo’u tino ua iloa ai e isi a’u. O la’u ‘ata, o’u mata, o’u lima, o lo’u laulaufaiava – ma o ia mea ua ou fa’asoai o ai a’u. O nei mea uma o le a suia, fa’amolemole le Atua, i le toetū. Ae tatou te fa’atuatua pea o le a lē mou atu.

FA’AMAGALOGA

E to’atele o le a manatuaina se fa’ aupuga ta’uta’ua mai iā Alesana Pope – “O le sesē, o le tagata, o le fa’amagalo, e mamana.” E ‘ese le moni o lea fa’ aupuga, e ui i se isi va’iga e

lē o atoatoa.

loe, Ua na o le Atua e to’atasi e fa’amagalo i o tatou fa’aletonu ma agasala ae, i le tatalo ua atoatoa lona matagofie na a’oa’o mai e lona Alo, ua tatou talosaga atu ai: “*Fa’amagalo mai a matou agasala, e pei ona matou fa’amagalo atu i ē ua agaleaga mai.*” E pei ona fa’ailoa mai e se tasi o tusi tala: Ua na o le tasi le talosaga i le Tatalo a le Ali’i ua fa’apipi’i i ai se olega: o le talosaga mo le fa’amagaloga.”

I le Salāmo ta’uta’ua o le fa’ato’esega o nisi o taimi ua ta’ua o le *Miserere*, o lo’o ‘ai’oi ai i le Atua lē na tusia: “*la e fa’amāmā iā te a’u, ona mamā ai lea o a’u; la e fufulu mai iā te a’u, ona sinasina ai lea o a’u e sili i lo le kiona.*” Ua ia iloa e tatau i lē ua agasala ona fa’alelei muamua ma Lē na faia o ia. Ona fa’apea ai lea ona alu atu ma fa’aleleia latou sa agaleaga atu i ai.

O le ‘ai’oi mo le fa’amagaloga a le Atua e lē tatau ona faia e pei o le ‘eli maia o agasala ua tuana’i. E le tatau ona sau mai ni popolega po’o ni masalosaloga pe aga’i atu fo’i i ai. Alu ‘ese mai sa’iliiliga ma popolega mata’utia. E tatau ona tatou o atu i le Ali’i ma le fa’amaulalo, loto salamō, ma le amiontonu i o tatou fa’anaunauga e fa’ato’ese, e pei o ni tamaiti, mo mea sesē na tatou faia. O le Atua e lē o se su’etusi e fa’amaumau tagata iā latou aitalafu i olaga o tagata, ae o lona mana’oga lava e auina atu tagata i se faigamalaga fou, o latou agaga ua fa’afouina ma fa’amalosia.

Ae o le fa’amagaloga mai le Atua e fuafua i o tatou mana’oga e fa’amagalo atu i sesē ua fai mai iā i tatou. O le itū tugā lea. E leai lava ma se isi ‘aula e ‘alofaga i ai pe suaia ai fo’i.

O nisi o taimi o le fa’amagaloga e faigatā tele ona o nisi o taimi e loloto le mafatia ma le tigā. E mafai ona maua, mo se fa’ata’ita’iga, i se fe’ese’eseaiga mātuiā i va o aiga ua mati pe fa’aleagaina ai papatisoga, fa’ainipoipo ga po’o falelausisa.

O le amataga o le fa’aletonu o le nenefu i le tuana’i o le taimi. Atonu o le mea matuiā tele po’o se fa’ aupuga e le’i faia ma se manatu i ai, atonu o se lē malamalamā o lē ua afaina, ua oso ai i le itā ma taunu’u ai i se tigā ua teuloto.

E o’o lava i se upu fa’atausua’i na faia ma le agaga mamā, ae o le fa’auigaina ua maua ai le fa’aletonu ma le feitaga’i. Ia ola peia le va’ai i luma ma le paganoa.

E fa’apefea i le tagata ona sa’ili se agaga o le fa’aleleiga? O le faia o se tusi, tusia ma le agaga o le salamō ma le alofa, atonu e fesoasoani, po’o le vala’au i le telefoni e feso’ota’i ai.

Ae ui i lea o le fetaia’i i se talanoaga pe sili atu lea, se feiloa’iga i le va o ia agaga e lua e tuputupu ai le agalelei. A tupu lenei, o le fiafiaga ma le alofa o le a ave’esea le inoino ma le lē fealofani; ae ui o se taumafaiga i se fa’aleleiga e lē ausia, o se faiga i le fa’amaoni sa taumafai atu i ai, atonu o le a toe galue mo se lelei i se taimi mulimuli mai e sili lea ma aga’i atu ai i se filemū.

“IA VI’IA ‘OE” (LAUDATO SÍ – Pope Falanisisi)

Fa'aliliuina: Falefou Sio



MATAUPU FA

FA'AVAE O LE SIOSIOMAGA

137. Talu ai le mafana o feso'ota'iga o mea uma, ma o fa'afitauli i aso nei e mana'omia ai se tofamamao e mafai ai ona amana'ia itu uma o fa'alavelave fa'a-le-lalolagi, ou te fautuaina ai ia tatou iloilo ni nisi o vaega fa'avae o le siosi-omaga, e tasi le mea ua manino lelei lona tulaga fa'aaloalogia o le itufa'aletagata ma le fa'a-agafeso'otai.

I. SIOSIOMAGA, TAMAOAIGA MA SU'ESU'EGA O LE
SIOSIOMAGA LAUTELE.

138. E su'esu'e e le Siosiomaga le so'otaga i le va o meaola ma le siosiomaga lea latou te ola a'e ai. O lea ua ala-gatatau ai ona avea ma tofāsa'ilī ma felafolafoaiga e uiga i tulaga e manaomia mo le ola ma le toefuata'i na o le sosai-ete, ma o le fa'amaoni e tatau ona fesiligia ai nisi o vaega o atina'e, i gaosiga ma le fa'aaogaina. E lē mafai ona lava le fa'alauiloaina pe fa'apefea ona feso'otai mea uma. O le taimi ma le vanimonimo e lē fa'alagolago le tasi i le isi, ma e o'o lava i atomi po'o mea nini'i i totonu o atomi e tatau ona iloiloina le ese'esega. E pei ona i ai vaega eseese o le paneta - o meafaitino, o vaila'au ma le fa'ameaola - e feso'ota'i uma, e o'o lava i meaola uma o se vaega o feso'ota'iga lea e lē mafai ona tatou su'esu'eina ato'aatoa ma malamalama i ai. O se vaega lelei o o tatou tupu'aga tu'ufa'asolo e fa'asoa e le tele o tagata ola. E mulimuli mai i le fa'asalalauga o le atamai ma le tu'ueseeseina o nai vaega o fa'amatalaga e mafai lava ona aveamoni o se itutaufa'avalea, se'i vaganā ua ofi atu i se tofāmamao mafalā o le meamoni.

139. A tatou talanoa e uiga i le "siosiomaga," o lona uiga-tonu lava o le so'otaga i le va o le natura ma le nofoaga o lo'o ola ai. O le natura e lē mafai ona tu'ueseua ma i tatou po'o se fa'atulagaga ua tatou feola ai. O i tatou o se vaega o le natura, tatou te aofia ai i totonu ma fegalegale'a'i ai i taimi uma. O le iloa o mafua'aga e mafua ai ona fa'aleagaina se nofoaga e mana'omia ai se su'esu'ega o galuega o le sosaiete, o lona tamaoaiga, o fa'agasologa o

ana amioga, ma auala e maua ai le mea moni. O fuafa'ata-tau i le suiga, ua lē mafai ona toe maua mai ai se tali ma'oti, se tali mautū i vaega taitasi o le fa'aftauli. E taua tele le sailia o ni fofo lautele e iloiloina ia fegalegaleaiga i totonu o auala masani ma a latou tulaga fa'a-agafeso'otai. Tatou tele'ofeagai ma ni fa'aftauli eseese se lua, o le siosiomaga ma le isi o agafeso'otai, ae fa'atasi ai ma se fa'aftauli lavelave ua lē gata i le va fealoaloa'i ae fa'apea foi le siosiomaga. O fuafuaga mo se fofo e manaomia ai le 'au'autasi e tete'e atu i le mativa, toe fuata'i le tamā'ali'iaga, ma puipuia ai le natura i le taimi lava lea etasi.

140. Ona o le fuainumera ma le tele o itu e tatau ona mata'itū pe a fuafua a'afiaga o le siosiomaga o se faiga-mausalī, e tatau tele le tu'uina atu i tagata su'esu'e a latou-matafaioi tatau, ina ia fa'afaigofie ai a latou fegalegaleai-ga, ma fa'amautinoa ai le sa'olotoga tau a'oa'oga. O su'esu'ega fa'aauau e tatau foi ona tatou maua ai se mala-malama'aga atili i va o meaola eseese, lea ua fauina ai le iunite tautele ua tatou fa'aaogā ai le fa'aupuga i aso nei: "siosiomaga o le ola fa'anatura." Tatou te amanaaina nei polokalame ua lē gata ina fuafua pe fa'apefea ona sili atu lona fa'aaogaina, ae fa'apea foi o latou tatau fa'apitoa i o latou lava aogā. O tino ola ta'itasi, e pei ona avea ai o foafoaga a le Atua, e matuā'i lelei ma matagofie iā i latou lava; e fa'apena foi le moni i le fegalegaleiga o meaola na faia i se nofoaga ma'oti ma feola ai e pei o se polokalame. E ui ina masani ona tatou leiloa ia mea, ae tatou te fa'alagolago i nei fa'apolokalamega tetele mo lo tatou lava olaga. E tatau ona tatou toe tepa i tua pe fa'apefea ona feso'otai meaola fa'alenatura i le fa'ata'apeina o le kasa-kapone, le fa'amamāina o vai, le puleaina o gasegase ma fa'ama'i pepesi, le fausiaina o le palapala, le nutipalaina o otaota, ma le tele o isi auala ua tatou lē mailoa ma tatou pogisai ai. O le taimi lava latou te malamalama ai i nei mea, o le a toatele ni tagata o le a latou iloa o lo'o tatou ola ma galulue i luga o se fa'avae o le meamoni na muā'i tu'uina mai ia i tatou, lea e ta'imua i o tatou olaga ma o tatou agava'a. O le mea lea, a tatou talanoa e uiga i le "fa'aaogātatau," iloilogua tatau ona tu'uina atu i meaola ta'itasi fa'alenatura le agava'a toe fuata'ina i o latou nofoaga ma yaega eseese.

141. O le tuputupua'e o le tamaoaiga, mo lana itu, e taumafai e faia fuafuaga fa'atino ma nisi fa'agasologa fa'apitoa e tusa ai ma le fa'amoemoe ia fa'afaigofie-taualumaga ma fa'aiti'itia o latou tau. Ua fautuaina ai le mana'oga mo se "siosiomaga tau i le tamaoaiga" e agava'a e fa'aihoa se tofamamao felefele o le meamoni. O le pui-puiga o le siosiomaga, o le meamoni "o se vaega taua i le fa'agasologa o le atina'e, ma e lē mafai ona taliaina le vavae'eseamai ai." Tatou te mana'omia vave se tagata ola e mafai ona tu'ufa'atasia matātāeiseese o le atamai, e ao-fia ai tamaoaiga, o auaunaga e sili atu ona taua ma

tu'ufa'atasi ai le tofamamao. I aso nei, losolo malie atu ai i le lautele o le so- o le au'il'iliga o fa'afitauli tau-le-siosiomaga e lē mafai ona vavae'esea-mai iloiloga tau i le tagata soifua, o aiga, o mea tau i galuega ma mataupu tau i a'ai, e lē amata mai i le fa'apefea ona feso'otai tagata taitoatasi ma i latou lava, lea e i ai taimi e tata'i atu ai i le auala e feso'otai ai ma isi fa'apea ma le siosiomaga. O lo'o i ai se faiā i le va o meaola fa'alenatura e fa'apena foi le va o li'o eseese o fegalegaleaiga fa'a -agafeso'otai, ma toe fa'aalia ai "o le meaatoa e sili atu nai lo se vaega."

142. Afai e feso'otai mea uma, ona o'o mai lea i le soifua maloloina o fa'alapotopotoga a le sosaiete i ona iuga mo le siosiomaga ma le manuia o le olaga fa'ale-tagata. "So'o se sauāga o le lotoautasi ma faigau fa'alemalō e afaina ai le siosiomaga." O lona uiga, o siosiomaga fa'a-agafeso'otai ua tatau ona fa'alapotopotoga, ma fa'aso-

saiete atoa, mai i le kulupu autū o le sosaiete, o le aiga, e o'o atu i le lautele fa'alotoifale, mālō ma atunu'u fa'ava-o -malō. I totolu o faiga fa'ata'atitia fa'a -agafeso'ota'i ta'itasi, ma i le va o i latou lava, ua atina'eina fa'alapotopotoga e fa'atonutonua so'otaga fa'ale-tagata. So'o se mea e fa'avaivaia nei-fa'alapotopotoga o le a i ai ni taunu'u-ga lē manuia, e pei o faigalētonu, sauāga ma ileiloa le sa'olotoga. O le tele o atunu'u e i ai se tulaga maualalo fa'atatau i aogā o fa'alapotopotoga, lea e mafua ai fa'afitauli ogaga i o latou tagata, ae fa'amanuiaina ai i latou o e selesele i la lea o tulaga. Pe e i totolu i pulega a le malo, i tulaga ese'ese o le sosaiete fa'ale-malo, po'o so'otaga i le va o i latou taitoatasi, ua sili atu ona ta'atele le lē fa'aaloalogia o fausia lelei, ae o lo'o tumau pea o se

tusi mate. E mafai fa'apefea ona tatou fa'alagolgo i ia o tulaga, o le tulafono ma aiāiga e feagai ma le siosiomaga, pe mautinoa moni ea e aogā? Ua tatou iloa, mo se fa'ata'ita'iga, o atunu'u ua i ai Tulafono manino e uiga i le puipuiga o vaomatua ae o lo'o fa'aauau pea ona gūgū a'o latou maimoa i tulafono o lo'o fa'aauau pea ona soli. E lē gata i lea, o le mea e tupu i so'o se tasi o nofoaga e mafai i ai ona a'afiaga tu'usao pe fa'aalatua foi i isi nofoaga. O le mea lea, mo se fa'ata'ita'iga, o le fa'aaogāina o fualau o'ona i sosaiete mauoloa ma ua fa'atupu ai le saga faifai pea ma fa'atupulaia le mana'o mia o oloa e fa'atau mai i itulagi matitiva, lea o lo'o mafatia i amioga taufa'asesē, ua fa'aumati a ola, ma o lo'o fa'aauau pea le fa'aleagaina o le siosiomaga.

.....fa'aauau pea.....

TALISUAGA MULIMULI PEI ONA FAAMATALAINA E MARIA MA MARETA

Tusia e Tina Beatie

MARIA

A'o amata fa'asolosolo ina tau gagaifo mālie le lā i lona tulaga masani, sa ou fa'alogoina le pā'o o ma'a i lea afiafi. Sa ou tū i le togāla'au o lo'o i le pito i tua o le fale, o taumafai e nātia la'u fa'alogi i lo'u loto, ona o lo'u fefe, e lagona le musumusuga a le ta'alogoligoa o lea taimi paganoa.

Ua ta'oto mai le ātaāta o le la'u o le olive i luga o le fogā'ele'ele, ma ua o'o mai lona paōlo ma uftia ai le vaega o lo'o o'u tū ai. Ua ou manatuaina lona latalata mai. O se tagata uiga 'ese. O se alofa uiga 'ese. O se po uiga 'ese. O se po ua sili atu lona uiga 'ese, lenei malamalama ua tau au ina mou atu mo le taimi muamua ma le taimi mulimuli foi.

Ua ou lē mautinoa, le tulaga lea ou te iloa, pe ou te iloa foi pe fa'apefea ona ou taumafai, ina ia 'ua ne'i o'u iloa. O le sau mālū o le afiafi ua taia ai a'u. Pe o i ai ea se moni o maua mai i le mālū o le si'osi'omaga, a'o o'u manavaina le sasala suamalie o lea manogi.

Ou te le'i fia sau i lerusalema mo le paseka. Sa ou fefe. O lea ou te fefe. O lo'o

fefe foi o ia. Ua suia lagona o tagata, a'o ma savavalu atu i le a'ai, ua va'ai mai ma foliga feīta iā i ma'ua. Matuā vave foi ona liua i latou i le taimi nei, i lo latou femoumoua'i mai le īta i le alofa. Ua fa'atusaina i fesoua'iga o afā malolosi e ileiloa le itulagi e agi mai ai i le Sami o Kalilaia. O tagata o lo'o fagogota i le tele o fetū i lea po ta'alogoligoa, ua fa'afuase'i ona feto-soa'ina ai o latou va'a e peau malolosi ma ua māsaesae ai o latou upega i le mata'u-tia o le fesoua'iga o galu o le sami.

Sa fa'apenā foliga o lenā afiafi, na matou o ai ma le au so'o i le latou va'a. E mamao le matou savaliga i lenā aso, ma o mea uma sa matou o i ai, sa lolofi mai le motu o tagata iā lesu. O i si sa o mai e fa'alogologo ma fia maua mai iā te ia se a'oa'oga, a'o i si sa femisa a'i ma finau atu iā te ia, ae o le to'atele na o mai tau lava ina ia papa'i atu ma fa'amaloloina, pe maua mai foi lana fa'amanuiaiga mo i latou e ala i le fa'alatalata atu ia te ia.

Sa i ai tinā na o mai ma ā latou fanau ia te ia i le aoauli. O le taimi lea, ua lelāvā ai o ia, a'o matou mālōlō uma i lalo o le paolo o le la'u. Na matou vā'ai mamao atu o savavali aga'i mai iā i matou o afisi

Faaliliuina e Falanisisi Anamani

mata'ita'i mai a latou fanau. Sa o Peteru ma Anitele'a e fa'atau i le nu'u tuāoi. Ua tau mai i la'ua i fafine, ua talanoa ma ua vala'au mai le i si ma fa'asinosino iā Peteru. E atagia mai ua lē fafia lesu. Ua tula'i o ia ma aga'i atu ile mea o lo'o i ai i latou. Ou te iloa lona lelāvā pe a fua i lana savalli. Peita'i ane, na va'aia lona fafia ina ua latalata atu o ia iā i latou. Ua ia si'i se tasi o tamaiti ma vala'auina fafine e o mai matou te a'ai fa'atasi. Ua ou iloa nei o lona fa'aseā sa fa'atūtū iā Peteru ma Anitele'a ae lē o fafine. O lo'o ta'oto'oto o ia i le paolo a'o fetaufetulua'i tamaiti i ona tafatafa, ae o lo'o fai talanoaga a fafine i mea o lo'o tutupu pea i o latou olaga.

Ua ou lelāvā ma lagona lo'u tau alofa iā Peteru, pe ana o a'u, semanū, ua ou mana'o foi e tutuli ese tamaiti. O lo'o matuā fafia lo'u uso o Mareta e tā'a'alo fa'atasi ma tamaiti ma talatalanoa i fafine. Ua pei i latou o ni manu felelei o lo'o fa'apotopoto i luga o se lālā la'u o valovalo ma ua lepetia ai le to'afilemū o lea taimi paganoa. Na i'u ina ou savalivali 'ese ma aga'i atu i tafatafa ane o le vaitūloto, ma o i'na na ou maua i ai le

TALISUAGA MULIMULI PEI ONA FAAMATALAINA E MARIA MA MARETA

filemū. Ou te maua, pea lava pea le filemū, pe a ou nofonofo na o a'u, le filemū lenā ua na o a'u lava e mafai ona ou fa'asoa atu fa'atasi ma ia.

Sa ou nofonofo ai i'inā, ina ua tau le lagona o latou leo i le ta'aligoligoa o lea taimi, ua ou lagona ai le gasē o le vao ma le ūū alisi atoa ma le fafati o peau o le sami i luga o le taligalu. Ou te fa'alogoina pei o se tagata o lo'o tilotilo mai iā te a'u. Na ou fāliu ma fetaia'i la'u va'ai ma mata o se tama'i tamaititi ma foliga palapalā ma le ulu ve'uve'ua.

Ou te lē fafia e tafafao faatasi ma ni tamaiti. Latou te leiloa ona natia o latou fa'anaunauga mo le lumana'i, pe fa'alilo foi lo latou fafia po'o mafatiaga. E fagofie ai ona iloa lu'itau o le olaga mo le lumana'i o lo'o ma fetaia'i, ma vaega ua ou toe salamō ai nei. O le fa'ataupupula a le tamaititi lea ua o'o ifo i lo'u loto. Sa leai so'u manatu ou te pupula totō'a i ai, peitā'i e lē mafai ona 'alo 'ese mai ai la'u va'ai. O nisi o taimi e fa'apenā le silasila mai a lesu iā te a'u, o fofoga o ni fa'amalamā e misitelio lilo, e ao ai ina ou taofi mau iā te a'u ne'i mea ane ua ou o'o atu i le leai atoatoa o mea uma ta'itasi. O lē fea? Pe a na ou malamalamā i ai, semanū ua ou iloa mea uma e ao ina ou iloa.

E lē mafai ona ou tulī 'esea lenei tamaititi e lē mautinoa pe o se tama pe o se teine. O ia o se vaega o le laufanua, o se vaega foi ia o le taimi ta'aligoligoa. O lo'o o'u ū'uina i lo'u lima se tama'i ma'a la-molemole lapotopoto na ou pikina ma ta'alo ai a'o o'u nofonofo ai i ī. Na fofola atu lo'u lima ma tu'u atu le ma'a i le tamaititi. Na ia avatu le ma'a ua tu'u i luga ma matamata i ai i le malamalamā peiseāi o se ma'a felanulanua'i ae lē o se ma'a efuefu masani mai le matāfaga. Ua savalivali lemū atu o ia ma togī le ma'a i totonu o le vai ma matamata i ai a'o amata ina galugalu fa'asolosolo atu i tua, o se va'aiga mata'ina mai se tama'i ma'a, a'o magoto atu i le 'alititai. Na fāliu le tamaititi ma 'ata mai ia te a'u, ma tamō'e vave ese atu aga'i i le itū o lo'o i ai fafine.

Sa ou matamata a'o goto mālie ifo le lā i le tauafiafi, ma le felanulanua'i o ao o tau fa'amalamalamā ai le pogisā o le lagī. Ua iila mai le vaituloto ma ua foliga mai o se tioata telē lanu mūmū ma sausau auro i luga o le fogā'ele'ele. E uma ifo ae ou iloa ua o uma fafine, ua leai ma se pisa se'i vaganā le ūlo a le lupe i le saumālu o le afiafi.

Ua afio mai lesu ua nofo i o'u tafatafa. Ua ou lagona lona latalata mai. Ua le mana'omia ni upu, ua fa'atumuina a'u i

lona fa'atasi mai. Ua to'olima o la ma fa'asaga atu ona fofoga i le lagi. Ua lafoia i lona tino ātaāta o le vai ma le goto ifo o le lā, ua si'omia ai nei o la e le malamalamā. Lo'u naunau ina ia pa'i atu ia te ia ona ua tusa ia ma se ave o le lā pe o se āta ua lafoia mai i le vaituloto. Ua ou va'ai atu i ona lima, o lima o le kamuta, e maua i ai le fa'amalologa uiga'ese i lona papa'i mai.

Na ou maofa i le taimi muamua na ou va'ai ai iā te ia o fai ana galuega, O le fausiaina o se laulau mo le matou fale i Petania. Sa ia fa'aaogaina meafaigaluega i se tomai fa'apitoa o lo'o ia tāina ai le la'au ia tino mai. O lo'o galue ma mafaufau loloto o ia, peita'i ane, e ma'eulea ituaiga to'afilemū o lo'o maua iā te ia. O foliga o se tagata o lo'o ia maua le filemū moni i lona loto. E ui ina o lo'o mafaufau i le galuega o lo'o ia faia, ae ou te malamalamā, o lo'o ia iloa, o lo'o o'u tu ai i o, e le o avea a'u o se fa'alavelave, peita'i o se atamai ma se talimālo lelei. Atonu pe o se fa'ilototole? A o galue o ia, pe o mafaufau o ia iā ma'uā ma Maretā, a'o ma nofonofo i le laulau fa'atasi ma ā ma uō. Pe na ia tu'u i le laupapa pe o le pito i luga o le laulau sina fa'amanatu e manatua ai o ia i taimi o le a matou a'ai ai?

O le aso lenā i tala ane o le Sami o Kalilaia, a'o o'u va'ava'ai atu i le goto ifo o le lā sa ou taumafai e fai se āta i lo'u mafaufau o lē o lo'o nofo i o'u tafatafa ae lē mafai. Na ou a'apa ma pa'i atu i ona foliga. Na ia u'u lo'u lima ma e na ou fa'apea atu, e faigatā ona ou talitonu lea e te i'inei. "Tilotilo," o lona si'uleo lea, "tilotilo i ī i le i si itū o le vai," na ou va'ai mamao atu i le lanu lau'ava mai o atumauga. Le tau pulapula mai o le malamalamā o ni fa'ailo o mafutaga i afiafi. O afi na tutuina e leoleo mamoe ma le aufaifaiva, o pa'aga a le po e feala pea a'o fe'ilafi fetū o le lagī.

Na fa'amatala e lona tinā iā te a'u, le pupula malamalamā o fetū i le po na fanau ai o ia, o se malamalamā uiga 'ese ua lē mālōlō lelei lafu mamoe i atumauga. Sa fa'apotopoto e leoleo mamoe tama'i mamoe ma sa'ili e mapu atu i le falemanu o lo'o latou api ai, ina ia fanau ai o ia. O se po mālūlū ma faigatā. Sa fefe o ia ne'i tulaga fa'aletonu le pepe, sa fa'amafanafana e se tasi o le 'au leoleo mamoe le pepe, e pei ona faia i se tama'i mamoe fou fa'ato'a fanau mai, na te si'i, o ia ma fa'apulupulu iā te ia i lona ofu talaloa.

A'o o'u manatua le tamaititi ma lana pu-lato'a fa'anoanoa, ma le pepe fou fa'ato'a

fanau mai, o lo'o sapasapai e le leoleo mamoe, na ou lagona ai se papa'i mai, uiga 'ese i lo'u loto.

Ua faapea mai o ia "O le 'a ou alu i le i si itū o le vai. E mafai ona e sau ta te o?"

"E faapefea ona e alu i o?"

"Toeititi ī Peteru ma Anitele'a e fagogota. Ou te alu matou te o."

Na tu'u atu lo'u lima ma ia fa'atu iā te a'u i luga, a'o o'u mafaufau i isi o le au so'o, Na o mai e su'e ma'uā ma o lo'o tutū latalata mai. Na ou tepa atu i fafine, i lo'u fia iloa pe o fa'alogologo mai. Na lagona mai e lo'u uso. Ua fetaui ma pupula ma e foliga mai o se lapata'iga o lo'o aumai e lana fa'ataupupula. O lona manatu e lē talafeagai lo'u alu matou te o ma tamalo-loa nei i le isi itū o le vai. Atonu o lo'o fefe foi ia. Ua na o ma'uā lava talu ona maliliu o ma'uā matua, ma Lasalo ae le fa'amoe-moe i ai se i si. Na oti muamua, ae o ai na te iloa pe toe tupu fo'i?

Ua mana'o Lasalo e avea o ia ma o ma tuagane. A'o feuala'i o ia i Petania i le tolū tausaga ua mavae, e su'e galuega ma se mea e nofo ai, ua talafeagai le avatu o ia e pei o se ma tuagane. Peita'i ane, na fetalai lesu, o matou uma o ona uso ma tuafafine. O matou o se aiga e fusia i le agaga ae lē o le toto. O ma'uā ma Maretā lo'u uso, e fusia i le toto ma le lotomomo-mo ma tino na ta'o'oto faatasi i le manava o lo ma'uā tinā. Ou te masalo, e leai se agaga e mafai ona fa'atupu se so'otaga fa'apea o le alofa ma le loto motusia i le va o ni fafine se to'alua. O le a lana mea e fai pe a i ai se mea e tupu ia te a'u?

Asi i lea, o lona fefe ua fa'amalosiaina ai a'u. Ua ou tepa atu i le vaituloto, ma o le agaga o le vai ma le afimumū o lo'o vala'au mai ia te a'u.

"Ioe," o la'u fai atu lea, "Ioe, ta te ī ma oe."

Na ou lagona le lē malie o Peteru a'o fesoasoani mai ou te alu i luga o le va'a. E le mafai ona talia e Peteru, o lo'o vala'au lesu i fafine e pei foi o tamaloloa ina ia avea ma ona so'o, ae sili atu lona te'ena o a'u nai lo le to'atele, talu ai ona e alofa lesu ia te a'u i se alofa fa'apitoa. E alofa foi o ia iā Peteru, peita'i ane, e lē taitai ona fa'alatalata atu Peteru pe lagona le pa'i atu o lenā alofa.

O lona manatu e lē talafeagai i fafine ona mulimuli ia lesu, ae fa'atuatuana'i i tulaga na tofia ai i latou i le lalologi. E sili lona fa'atuatuaina o Maretā nai lo a'u, e ui lava foi na tu'u e Maretā ana galuega ae mulimuli atu ia lesu fa'atasi ma isi. Asi i

TALISUAGA MULIMULI PEI ONA FAAMATALAINA E MARIA MA MARETA

lea, o lo'o fiafia pea o ia i lona taofi o ia lava na saunia le taumafataga mo i matou uma. O nisi taimi ou te fa'apea ai o le ituaiga olaga lava lenei o le a ou ola ai, le avanoa lenei o le alofa sa'oloto o lo'o ofoina mai e lesu. Ae i ai le taimi e va'ai ai lo'u uso iā Lasalo ma iloa lona alofa, ma fa'aipoipo ma maua se fanau, o le a lē toe tutusa foi lana va'ai iā lesu. O le a avea o ia o se tupu'aga o lona alofa faatinā ma lona agamalū, e pei foi ona avea pea o ia o le tupu'aga o lo'u alofa ma o'u fa'amoe-moega.

Ua fa'apea ona matou o atu i le va'a o Peteru ma Anitele'a ma lagonaina le manaia o le manogi o le 'ea i lea tauafiafi. Ua pogipogi le afiafi ma ua tau leiloa atu ai le laufanua ma ātaāta o lo'u uso ma isi, o lo'o vāai mai iā i matou mai le matafaga. Na tu'u lo'u lima i le sami a'o o'u nofon-ifo i talane o lesu, a'o lo'o tatā upega o Peteru ma Anitele'a ma sauni la galuega o le afiafi.

Ua fa'afuse'i ona agi mai le afā, o matagi malolosi ma timuga mamaifa ua taia ai i matou. Ua fesoua'ina le sami ma ua fetogia'i solo ai le matou va'a. Ua amata ona tofu i lalo le va'a ma taia solo i galu malolosi. Ua lavelavea solo lo'u lauūlu, ma ua fetosoa'ina solo a'u e galu. Ua ou tepa atu ma iloa le fefefe i foliga o Peteru ma Anitele'a, ma o lo la atuatuvale ua tupu a'e ai le fefe i lo'u loto.

Ua ou le popole pe matou te feoti ai. Ua ou malie i ai tusa lava pe o atu ai pea lava i lalō faatasī ma ia, a o'o mai ai lo'u taimi mulimuli peita'i o lo'o o'u iloa lona alofa. Na ou fāliu i lo'u fia iloa pe o fefe foi o ia.

Peita'i ane, o lo'o ta'oto o ia, o fa'alogo-lago i le taumua o le va'a, o lo'o moe gapepē e pei o se pepe i lima o lona tinā. O le afā fulifaō, ma le fesoua'ina o le va'a, le fafati malolosi o galu atoaa ma le ta'alili o matagi ua matou fa'alogoinga ua pei o ni pēsega mālie mo ia. Ua va'aia le to'afilemū o ona foliga ma le tau ātaāta pei e atagia mai o lo'o fai sana miti mālie.

"Le Alii e, le Alii e! Ua goto le va'a.", ua fa'alogoinga le fefe i le leo o Peteru. Ua ala mai lesu, ma ou iloa le taula'i o lona va'ai iā Peteru, e foliga mai o lo'o ia lu'itauina o ia. E lē o mana'omia e Peteru se lu'i mo ia i lea taimi. Ua gatete lona tino, ma ua tau melo tagi o ia, "Le Alii e, e i ai lo'u to'alua ma le ma tama. O ai na te tausia i la'ua pe a fai ae ou oti?"

Ua fa'alemū ona tepa 'ese lesu mai foliga o Peteru, ae taula'i atu lana va'ai i le sami. Pe na fa'afuse'i ona tupu pe na fa'asolosolo mālie le matagi? Ou te lē

iloa. Pau lava le mea ou te iloa, sa i ai le taimi - taimi pu'upu'u, o se itulā? – na taofi ai le taimi, ma ina ua toe amataina le taimi, ua to'afilemū le sami, ma ua malū foi le matagi, ua tusa o se musumusuga o fa'alogoinga lona fa'apea mai, "O fea lou fa'atuatua? O fea lou fa'atuatua." O upu po'o le fe'au lea o lo'o 'aumai e le matagi. Po o upu foi ia sa ou lagonaina na aumai e le matagi. Pe sa fa'alogo foi i ai Peteru? O fea sa i ai lona fa'atuatua?

Sa i ai lo'u fa'atuatua. Pe a fa'apea e ta'ua le vaega lea o le fa'atuatua, le fa'anaunauga lea e i'u ina lolo, tusa lava pe 'oo i le oti, ae o lenā po na ia te a'u uma le fa'atuatua o le 'au perofeta ma le fa'atuatua atoa o le tala fa'asolopito i totonu o lo'u loto, peita'i ane sa fefe Peteru, ma ua te'a le afā, ma ua fai ifo lo'u fa'atuatua, i se ituaiga lagona uiga 'ese o le fa'anoanoa, ma se avanoa ua leiloa, e lē toe maua mai.

Le anoanoa'i o mafaufauga ua fetuleni mai, ae aiseā ua lē mautonu ai, aiseā ua fa'afuse'i mai ai le toe fia fo'i i ai, pei e foliga mai o taimi nā, ua mou atu e lē toe maua mai. E toe i ai le taimi matou te toe o ai foi i le va'a o Peteru, ma 'ou toe te-pataula'i ai i fofoga o lesu ae o tofā o la. O le a i ai foi nisi aso ma nisi po o le a matou fealolofaa'i, fiafia ma fetāgisi ai. Ou te lē talitonu fa'ato'a ou maua ia lagona, ae ua toe leiloloa atu. E telē se fa'anoanoaga o lo'o lagonaina i lenei afiafi, o lo'o o'u fefe foi, ae ou te leiloa pe o le a le mafua'aga ou te fefe ai. Ou te lē o fefe i le afā, ae ou te fefe i le leai o se pisa, ona ua matuā ta'aligoligoa le po.

Sa ou taumafai ina ia 'ua ne'i o'u mafaufau i ai, ae ia ou mafaufau i taimi muamua atu ae le'i i ai lesu i ō ma'uā olaga, taimi sa ma'ua faatāua ai nisi o vaega, nai lo le alofa iā te ia. Na ou mafaufau i le matou fale i Petania, a'o fai galuega kamuta a Maretā ma nisi o tamaloloa i lea aso ma lea aso, o ni tagata malolosi, e si'is'i, tu'itu'i samala, fa'amafolafola le simā, e galulue mai le taeao se'i o'o atu i le afiafi ua palapalā uma.

Na fasioti e tagata Roma o ma'uā mātua i le taimi mulimuli o le vāvāō ma le vevesi o le mālō, ma fa'alèaga ai le matou fale i le tausaga na soso'o ai. Na fa'ataute'e atu i ai lo'u tinā i le latou pulega. Pe ana ou le va'ai i tulaga sauā na latou fa'ao'o i lo'u tinā, semanū ou te fa'apea lava o ia o se tagata lēfefe i le āta o le oti. Na fusi atu a'u e si o'u uso o Maretā, ua ma fa'alogoinga le ma fefefe. Sa tu lo ma tamā i tala

ane o lo ma tinā o augani fa'alausoso'o atu, "Fa'amolemole, fa'amolemole," mae na i'u ina fa'ao'o loa e le tagata Roma le oti iā te ia i le pelu. Na ou lagona ae ou te le'i va'ai i ai i le maliu o lo'u tinā. Pe na moe'iini Maretā i lenā taimi mulimuli? E le taitai o'u fesili i ai?

Ina ua mae'a tapena o la tino mo le fale-lauasiga, na ou fa'apea ifo i lo'u loto, e le taitai ona ou toe mapu pe iloa le filemū ma le olioli. Na ma maua sina fasi fanua i le nu'u ona amata lea ona fau ai se ma fale, ua fa'asolosolo mai ai ona amata ona toe i ai so ma fa'amoemoe, ma ua toe maua mai le fiafia.

O Lasalo na amata toe maua mai ai lo ma fiafia, ma e na fesoasoani foi o ia iā I ma'ua. Na va'aia tama'i manufelei o felelei solo o fe'ilafi ma felanulanua'i mai o latou lanu i le vanimonimo. E foliga mai i latou pei o ni avefe'au taufa'amata'u mai se lalolagi o mafatiaga.

O lo'o savalivali a'e tagata e aga'i atu i o latou aiga, o fafine o lo'o fa'alogoinga ā latou talatalanoaga o le aso.

O se tagata tino lelei ma malosi Lasalo, ua sauni e faigaluega, e taunu'u mai o lea amata le galuega o le matou fale ma sa galulue fa'atasi pea o ia ma Maretā i aso uma.

O le tagata o lo'o ma fa'aipoipo e lē fa'atusaina i le to'alua lea, ua leva ona ou alofa i ai. Na ma fa'aipoipo i le taimi tonu fa'ato'a uma ona fa'aleaga e tagata Roma le matou fale. Ua leai se nofoaga ma te nonofo ai, na ia ta'ua, a ma fa'aipoipo e mafai ona matou nonofo fa'atasi ma lo'u uso. E leai se ma fanau, ma o se tasi aso, ua malaga mamao ai o ia i ni malaga o fefāataua'iga. Na fa'atumuina a'u i le fiafia i le taimi na malaga 'ese atu ai o ia. Ou te le'i toe fia nofo ai i lona fale ona e tele ni fa'anoanoaga ma mafatiaga na tupuga mai ai. O lea na ma ō 'ese ai loa ma lo'u uso ma amata fau lo ma fale i Petania. Ua amata ona toe amata fuafuaga fou o ma olaga ma Maretā, a o nātā i taimi paganoa o'u lagona, ua na o le Atua na te silafia le mea moni, sa ou tatalo ma le fa'atauanau iā te la, ina ia 'aua ne'i toe foi mai o ia.

.....*faaaauau i le lomiga i luma...* ...

UIGA FA'ALETAGATA MA LE FA'ALAVELAVE A LE AGASALA

Afai o le ola ai o le tagata e lē fa'apea e leai sona aogā ona i ai lea o sona uiga, ma e tatau i tagata ona iloaina po'o le ā lenā uiga. Afai o lenā uiga ua mafaufaufina o se mea e fa'aauauina e pei o se vai tafe e ala atu i se vanu, a tafe e aunoa ma se fa'alavelave i lona amata mai i lona punavai mai se vaipuna i le mauga, ma tafe atu i lona alagāvai ma taunu'u i lona taunu'uga i le moana. E leai se isi na taofia. E leai ni fa'atanoa, leai se tafe'ese, leai se mea e taofia le vai mai le vaipuna mai le mauga ma taunu'u i le moana. O le faia o lea faiga o le natura lea o le vai tafe.

Afai ole olaga ole tagata e pei o se vaitafe, lona uiga e i ai fo'i lona amataga ile Atua ma e gaioi e ala ile olaga se'ia taunu'u i lona atoaga ile Atua. O le Atua o le vaipuna ma le moana. Ae pei ona masani ai ona fa'ailoa, o tagata ola, e pei o vaitafe, e mafai ona fa'atanoaina ma suia le ala e tafe aga'i i ai e ala lea i gaioiga a isi tagata ae, e lē pei o vaitafe, o tagata e mafai lava ona latou fa'atanoaina a latou ala fa'anatura po'o nofoaga ma 'fa'alavelave e ui i le tafe' i le va o la latou punavai (le Atua le vaipuna) ma la latou taunu'uga ma le uiga tatau (le Atua le moana). I le va o le amataga ma le i'uga, i le va o le punavai o le uiga ma le atoaga o lenā uiga, e mafai e le tagata ona faia ni fa'alavelave. O le mafai ona fa'alavelave le tafe mai o le uiga o le amataga i le uiga o le taunu'uga, ua ta'u mai ai iā i tatou se mea pito sili le tāua e uiga i le tagata ola, e uiga i lo latou natura tatau ma le uiga o le fua o le alofa o le Atua ma lona alofa mo latou: ua tu'uina atu le sa'olotoga ile tagata o le loto filifilia ma ua fa'atagaina le tagata e fa'aogā lea sa'olotoga i vaega uma o latou olaga. O le sa'olotoga ole fa'ailogia lea a le Atua le Silisili'ese.

O lo'o fa'amatala mai ai fo'i le anano e uiga i le Atua, o le Atua e lē fefe i le sa'olotoga po'o lona fa'atinoina. O le sa'olotoga o se iloga a le Atua ua ta'u maia iā i tatou o le foafoaga e le Atua o le tagata e lē o se masini ma o a tatou filifiliga e lē iloa tino pe foliga

mai ae o filifiliga e tatau. O a tatou filifiliga la e i ai uiga, ola ai, mafua'aga ma tu'utu'uga.

O le sa'olotoga o se elemene tāua lea mo fa'amalologa ma fa'ama'i, agasala ma le fa'aolataga. E tupu le agasala i so'o se mea ma so'o se taimi e fa'aogā ai e le tagata o latou sa'olotoga e fa'alavelave ai i le lelei, pe 'a muamua sa'ili le leai o se moni i lo le sa'ilia o le moni ma faiga filifiliga i le maliu ae le'i faia filifiliga mo le avatu o le ola. O le agasala e a'afia ai le fa'aleagaina o le isi tagata po'o se gaioiga, e fa'aleagaina ai le tamalli'iaga o se tagata po'o se gaioiga ua tu'uina ai lenā tagata o se mea ua itagia po'o le fa'aogāna po'o ua fa'asaunoaina, ua ave'eseina ai le uiga o le tagata po'o se gaioiga ua va'aia ai lea tagata ua na o se mea e ītagia, fa'aogā ma fa'asaunoaina, ua muta ai ma se 'va feagai e i ai sona uiga' i le va o a'u ma le isi tagata. Mo se fa'ata'ita'iga, ina ia fa'amalosia se tama'ita'i, e muamua i lē e fa'ataunu'ua lea faiga ona ave'esea itū tagata a lea tama'ita'i. Ona pei ai lea o ia o lē ua fa'amalosia ma e leai se mea ua tutusa ai la'ua. E malamalama le ali'i ua faia le uiga o le fa'amalosia o le tama'itai o ia o le tagata e i ai mana'oga ma tu'inanau, o le tama'ita'i ua fa'amalosia ua malamalamaina e lē ua fa'amalosia ua na o se mea e fa'amalieina ai lona tu'inanau ma mana'oga. E ao fo'i i le ali'i lea ona 'aua ne'i fa'atagataina lea gaioiga ina ia leai sona ia lava uiga 'ese mai ai ma uiga masani e o gatasī ma gaioiga o le feusua'iga. Mo lea ali'i o lea gaioiga e le tutusa lona uiga ma le gaioiga o le alofa, e ui o la e malamalama i le gaioiga o le "faia i le alofa", o le a tineia nisi o elemene lē tatau ai, e pei o le fa'amalosia o le tama'ita'i. E fa'aogā e lea ali'i le tama'ta'i o se mea e fa'amalie ai ona mana'oga. O le faia o lea e ao ona ia ave'ese le mea e tasi o lo'o noatia ai o ia i le tama'ita'i, o tulaga ia tutusa o tagata ola. E ao ona ia ave'esea lona tulaga fa'atagata mai lē ua ia faia ai le agasala o le tineia o le mea moni o le tulaga foafoaina o le tama'ita'i, e pei o na faia o ia i le fa'atusa o le Atua. O

le agasala fa'atupulia i le tineia e le ali'i lea o le moni fa'anatura o lea tama'ita'i o se tagata, na fa'aolaina e ala i le misitelio o le liutinotagata ma ua lē fa'aaloalogia lona tino o se malumalu a le Agaga Pa'ia a le Atua, a ua ia faia o se mea e leai se ola ma ave'eseina ai lona sa'olotoga.

O se faiga tutusa lea ma agasala uma lava. Ina ia ita i se tagata e ao ona muamua ave'ese uma ona itū tagata o se uiga o le mauaina o se mea mo a'u lava. O le agasala e loto fa'apito. O le lelei, i se isi itū, e faia lelei tagata o se mataupu e fesoasoani i ai pe mafatia fo'i i ni āga, manatu po'o upu. A tatou lē va'aia se isi o se tagata, o se vaega mo gaioiga, le tasi e faia i ai, ona lē fa'atāuaina lea ma ua fa'atemonioina i latou. O le filifiliga lenei o le sa'olotoga a le tagata ae o mea e tua i ai lea sa'olotoga ua fa'asoa lea ma isi.

E mafai ona va'aia le sa'olotoga fa'atagata o se fa'afitauli autū ma le manatu mo se taunu'uga o le leai o se amana'iaina po'o se popole i ai. O le isi taunu'uga o le maitauina lea o le sa'olotoga, e lē o le mafua'aga o a tatou fa'afitauli ae 'a sau le sa'olotoga mai le tiapolo o le sa'olotoga lava ia ua puapuagatia' (Ormerod, 1992, p.3).

O le mau Katoliko i le sa'olotoga ma le fa'amalologa o lo'o maua'a lea i le mau o le afio ai fa'aola a le Atua e mafai ona ulufia le sosaiete atoa a tagata, o le mea lea ua fa'ama'oti ai se musuā le lē amana'ia pe le a'afia fo'i se tagata mai le mauaina o le fa'amalologa. I le i'uga o le sa'olotoga a le tagata, fa'amalologa ma le mafatia ua a'afia i le fete'ena'iga i le va o le kalasia ma le leai o se kalasia, i le va ole alofa ma le leai o se alofa. E malamalamaina lelei le kalasia o le tatalaina o le sa'olotoga.

O Sakalameta o fa'amalologa e sa'ili e fausia se 'aula laupapa i le va o le kalasia ma le leai o se kalasia, le va o le i ai o le alofa ma le leai o se alofa. E tatau ona fa'amaautu pea le mafutaga tāua i le va o le sa'olotoga tau tupu a le Atua, le sa'olotoga fausia a le tagata, le fa'aolataga ole Misitelio paseka,

UIGA FA'ALETAGATA MA LE FA'ALAVELAVE A LE AGASALA

le moni ole agasala ma le tiapolo ma le agalelei ma le fa'aleleiga. E ao ona tu'u avanoa iā i tatou lava fo'i, se Atua ua masani tele i le moni o le agasala ma e iloaina le uiga moni o le maliu ile moni fa'atelosia, ae lē na o se fa'aletino, ae ua sopo'ia e le

agasala po'o le oti. O le faia o lea ua mafai ai e le Atua ona tu fa'atasi ma i tatou i o tatou ma'i, puapuagatia, agasala ma le oti. O se Atua e silafia le a'afiaga o nei mea, ae e lē fa'aitiitia ai ma o Lē e mafai ona ta'ita'ia i tatou i le sa'olotoga, mai le oti, i le ola po'o,

e pei ona patipatia i le fatu o le Sauniga Fa'apaseka i le Afiafi o le Eseta, mai le pogisā i le malamalama (Jurgen Moltmann. *Telosia o le Fa'amoemoe* ma *Le Atua Fa'akoluseina*).

.....fa'aauau pea.....

O GALUEGA A LE AU APOSETOLO

Fa'aauau mai lomiga iā Mati...

Ona o se fa'apotopotoga o tagata ua salalau i le Malō o Roma, sa mana'omia e le ekalesia se fa'amatalaga o ia lava e fa'amatala ai a'a fa'aea (amataga mai tagata anamua a Israelu) sa le'i alia'i mai ai se taufa'amata'u i mataupu fa'apolokiki ma Tulafono a Roma. Ma o lo'o fa'amamafa mai e Luka le fa'ataunu'uina fa'atusi pa'ai ma fa'amamafa mai ai le amiontonu o lesu ma latou sa mulimulii ai i fa'amasinoga a ali'i o le Malō a Roma.

O se ekalesia o lo'o tuputupu a'e e mana'omia ni faiga mo le fetaia'i ma le lalolagi o lo'o feiloa'i atu i ai. Ona fa'amatala lea e Luka se tala'aga anamua e le ua na o le manatunatu "i ala sa tatou masani ai" ae i le ituaiga o gaioiga "i ala ua tatou i ai nei." Ioe, o le mafua'aga lea ua avea ai Galuega a Apostolo o se tau tumau i le ekalesia. E ui tatou te lē mafai ona toe fa'aluaaina aso anamua o le ekalesia, ae tatou te maua lava ni fa'amanatuga o mea ua tumau o latou tāua i le olaga o le ekalesia i tala a Luka o na aso anamua.

O le a so tatou manatu inā tautalaga pupu'u? E tasivae tolu o tusitusiga a le Galuega a Apostolo o tautalaga pupu'u. E masani ona manatu le 'au faitau o ni vaega e pei o ni "lipine" o tala'iga fa'aapostolo. O su'esu'ega malosi a le au tusitala fa'asolopito Eleni o le seneturi muamua na ta'ita'iina ai le au su'esu'e i se isi fa'ai'uga. O se tasi o mea faigaluega a tusitusiga o tala fa'asolopito i le lalolagi o Metitania o na aso o le tusia lea o tautalaga e tu'u i laugutu o latou e fa'apitoa ona fa'aliliuina uiga o mea o lo'o tutupu. I se isi fa'aupuga e o'o lava i taimi o le au fai tala fa'asolopito a Eleni o latou ia safamaumauina mea sa tautala ai se tagata tāua i se taimi fa'apitoa, ma latou manatu o se vaega tāua o tusitusiga lelei o le talafa'asolopito e fa'aoga lelei ai le lē mautinoa, fa'atasi ai ma punavai ua latou maua, ma tusia ai se lauga po'o se tautalaga ua pu'epu'eina le moni e tatau i mea o lo'o tutupu. O le tele o le 'au a'oa'o a Luka na fa'amautinoaina o tautalaga i le Galuega o lo'o momoliina mai tusitusiga mai taimi ua tuana'i, lona uiga, o Luka, ua fa'aoga tu masani sa fa'asolo mai e apostolo, fausia ai tautalaga ma tu'u i laugutu o Peteru, Paulo ma Setefano e fa'amatala ai i le au faitau le uiga o le tala fa'asolopito o lo'o fa'amatala mai.

Mo nisi o tatou ua manatu ua tatou fa'alogoina tautalaga, upu na tautala i ai Peteru, Paulo ma Setefano, o se auala lenei e malamalama ai i tautalaga, muamua, o se fa'anoanoaga tele. Ae i le taimi mulimuli, o le auala ua tusia ai e Luka nei tautalaga i se faiga na fai ai e latou na muamua tusitusia tala

fa'asolopito ua manino lelei mai ai le talafeagai. Ona o na tautalaga ta'itasi o lo'o manino lelei uiga na fai aga'i i le au faitau a Luka i lo le aga'i i le au fa'apotopotoga o lo'o a'afia i le tala. Ioe, o nei tautalaga faia i luga o le isi ma o lo'o manatu o le au fa'alogologo ua mae'a ona faitauina le Evagelia Iona Tolu ma le Galuega a Apostolo ataoa.

O fa'amatalaga pupu'u nei, e le o ni lipine e ao ona tatou fa'atulaga lelei, ae o mea ua tatou maua o fa'auigaga ma le pule atoa a Luka o talafa'asolopito anamua a le ekalesia. Ona o tusitusiga o lo'o i ai, ua aumai ai fo'i ma fa'ata'ita'iga o le fa'aogaina e le ulua'i ekalesia o le Tusi Paia i le folafolaina o le tala lelei. I se va'aiga mulimuli ane, o se faiga e fa'amalieina ai ma a'oa'oina ai le faitauina o nei tautalaga. O nei talafa'asolo o le a taumafai e fa'amatala.

Fa'ata'atiaga. O le tele o le 'au fa'asalalau ma le 'au tusitusisa maitauina o upu a lesu i le 'au so'o ae le'i afio i le lagi o lo'o maua ai se āta fa'ata'atia o le Galuega: "E fai fo'i outou ma molimau iā te a'u i Ierusalem ma lutaia uma lava, ma Samaria, e o'o lava i le tulu'iga o le lalolagi" (Galuega 1: 8). I lenā va'aiga o lo'o fa'ailoa mai i laina i lalo:

O le Keriso Toetū ma le Toe Fa'aleleia o Israelu i Ierusalem (1: 1 – 8: 3).
O le Misiona i lutaia ma Samaria (8: 4 – 9: 43).
O le Amataga o le Galuega Tala'i i Nu'u'ese (10: 1 – 15: 35).
O le Galuega Talai a Paulo i Tulu'iga o le Lalolagi (15: 36 – 28: 31)

O le 'aula ua fa'ata'atia mai ai le āta o gaioiga tetele a le tala fa'asolopito a Luka ua atagia mai ai fo'i se tasi o tusitusiga-mautū mai le Tusitusiga Pa'ia ua ia fa'aogaina e fa'auiga ai mea o lo'o tutupu i le ulua'i tala'aga a le ekalesia:

A lenei, o lo'o fetalai mai le Ali'i,
o lē na faia a'u mai le manava e fai ma 'au'auna iā te ia,
e toe fa'afosisia lakopo iā te ia.
E ui lava ina le fa'apotopotoina o Israelu,
Ae vi'a a'u i luma o le Ali'i;
E fai foi lo'u Atua mo'u malosi.

O GALUEGA A LE AU APOSETOLO

Ua fetalai mai fo'i o ia,
"O le mea māmā ina ia fai oe ma 'au'auna iā te a'u,
Ina ia fa'aeaaea mai itū'aiga o Iakopo,
ma fa'afoisia mai ē ua fa'asaoina i Israuelu.
Ua ou avatu fo'i oe e fai ma malamalama o nu'u 'ese,
e fai ma a'u fa'aolataga 'ia o'o i tulu'iga o le lalolagi
(Isaia 49: 5 – 6)

Maitau le perofetaga e uiga iā Israuelu 'Auauna e aofia ai ni la'asaga se lua: muamua, ole toe fa'aleleia o Israuelu (le se fululua o lutuaiga a Iakopo); Iona lua, avea ma "malamalama o nu'u uma." I le Galuega a Apostolo, ua fa'ailoa mai ai e Luka lenei perofetaga ia fa'atunu'uina.

O le la'asaga muamua a Isaia, o le toe fa'aleleia o Isaraleu i le i'uga o le taimi, ua talatala mai ai i gaioiga muamua e lua i Galuega – muamua i le toe fa'aleleia o tagata Israuelu ma lutaia uma mai nu'u uma (1: 1 – 8: 3), ona tatala atu lea o

Iutaia i nu'u i autafa ma aga'i atu ai i tagata Samaria (8: 4 – 9: 43). O le la'asaga Iona lua a Isaia, avea ma "malamalama i nu'u uma", ua tatala mai i nisi gaioiga se lua–muamua i le amataga o le misiona i Nu'u'ese (10: 1 – 15: 35), ona aga'i atu ai lea i le galuega tala'i a Paulo i le "Tulu'iga o le lalolagi" (15: 36 – 28: 31).

O lenei tusitusiga o le a fa'ailoa mai ai le fa'aauauina o ni fa'amata'osi se lua o lenei fa'atomuaga: (1) o le fa'aauauina o le tala i le va o lesu ma le tala o le ekalesia, ma (2) le fa'aauauina i le va o le tala a Kerisiano o se atoaga ma le tala umi o le olaga o Israuelu ma le Atua, e pei ona fa'amatalaina ile gagana Eleni i le Tusi Pa'ia Eperu. O le tāua o lenei faiga sa malamalamaina sa fa'atāuaina e se tusitusiga a le Komisi Fa'atusipa'ia a le Tupusa (Pontifical Bible Commission), "O Tagata Iutaia ma La latou Tusitusiga Pa'ia i le Tusi Pa'ia Kerisiano" (Vatican City: Libreria Editrice Vatican, 2002).

Tatou amata nei ona faitau i le tala tu'ufa'asolo a Luka.

.....fa'aauau lomiga i luma.....

14

PHOTO GALLERY




HOLY FAMILY PORIRUA



SAMOAN MISASA
15 MATI 2020

PHOTO GALLERY



NAENAE SAMOAN M SASA

15



08 MATI 2020



O a tatou fa'amoemoega e maua mai i le Liutino Tagata

Afai e mafai e le lima afe o tagata i Kalilaia ona mulimuli ia te ia aga'i atu i le toafa ma manatuaina ai le taimi ma le fia 'ai ona ua maofa i latou i lona tagata, o le a se mea o le a tatou maua pe a tatou va'aia o ia i lona Toetu mamalu, le tagata amio tonu, o le uō aupito sili, o se ali'i e sili le agamalū, o ia e lē suia!

O le a tatou tutū fa'atasi ma lona tinā ma ana uō uma i se faigā uō mafana. O le a mafai ona tatou talanoa ma Peteru, Ioane, Mose ma isi au Kerisiano lauiloa. O le a tatou maua ai ma isi faitau miliona o tagata pa'ia, ua atagia mai ai le Atua e fa'avavau i isi auala. Ona i ai lea ma le 'au agelu, ma a tatou agelu tausi.

Ma a tatou uō uma ma aiga, o tane, fanau, ma avā o le a fa'atasi uma – fa'atasi i le Atua! E tumau lava o ta'ito'atasi sa i ai i le 'ele'ele nei, ae o avanoa tāua na fausia i totonu o tatou o le a maua le fa'ataunu'uga. O le a leai se mea e fa'alavelave i o tatou atoaga i le tasi'aga ma le Atua. Iā te ia o le a tatou iloa ai mea uma lava. Iā ia o le a tatou feiloa'i atu ai i isi fanau. E leai se mea e ave'eseina ai la tatou mata'itū mai iā te ia. O nei mea uma lava, e fa'avavau fa'avavau lava. Fa'atasi ma le Ali'i, "o le aso e tasi" e mafai ona fa'auiga i tausaga e afe, o le afe fo'i o tausaga e tusa ma le aso e tasi (2 Peteru 3: 8). Ioe, e moni, a o tatou faitau le Tusi Pa'ia o tatou e iloaina lesu o lo tatou Fa'aola e ao ona vivi'i o ia ma osooso ma le fiafia ile manatu o lea mamalu e fa'avavau.

O Le A Le Uiga O Le Avea Ma "Fanau Laiti" A Le Atua

Mai le taimi o lona to'ilalo, o le Agelu o le Pogisā sa fealua'i i le lau'ele'ele sa'ilili le Alo ma le Fafine. Sa manatu ua ia pule ina ua mafai ona ia tu'uina atu le mimita ma le faualuga iā Atamu ma Eva. Na fa'ate'ia o ia ina ua alofagia e le Atua i la'ua, ma toe fa'amanatu i ai le Fafine ma lona Alo. O lona īta mo le Atua na fa'amalosia ai o ia e sa'ilili le fa'aleagaina o agaga uma ua fa'amoemoe e fiafia i le mamalu o le lagī sa ia tiā'ia.

Ina ua uma ni seneturi, sa fa'aseseina o ia ma fa'asaoina ai le tagata i le ola, maliu, ma le toetū o lesu, ma atili ai lona īta. Afai e lē mafai ona tosina uma i latou i le vanu, atonu na te mafaia, i le taufa'aosooso, fa'atosiga, mana'ona'o, mimita ma le gula, fa'aitiitia o latou lelei ma le mamalu e fa'avavau...O le Atua i lona Agalelei e lē muta, o le a lē tu'u lafoa'ia i tatou i se taua e lē agatonu. O le a pei o se tamaititi e finau ma se sainitisi. I lona Alofa e lē Uma ma le Faimeatonu, o le tu'uina mai e le Atua iā i tatou ta'ito'atasi se agelu – se agelu e tutusa i auala uma ma le agaga o le tiapolo o lo'o galue pea mo so tatou leaga. O lenei agelu o tatou lava e āna ona na fai mai Sagata Pateru i lana Tusi, *o le tiapolo lea, o lo'o fealua'i o ia e pei o se Leona tagi, ua sa'ilili se tasi e 'aina e ia* (1 Peteru 5: 8). Ioe, tatou te mana'omia se tasi o nei agaga mamalu e finau atu i le tele o taua e lē va'aia mo le faoina o tatou agaga – o taua e moni e pei o le 'ea ua tatou manavaina ma e lē va'aia fo'.

Pe sa fa'aali e lesu nei agelu tausi iā i tatou? Ua tatou iloaina se tasi o aso sa ia fai atu ai i ona so'o a le avea i latou e pei o ni tamaiti e lē sao atu i le Malō o le lagī. I se isi fa'aupuga, e ao ia i latou ona tauave uiga fa'atauva'a ma le fa'amaoni a le tamaititi ina ia avea ma āna. Sa fa'apea mai a lē pei o ni tamaiti e lē sao atu ile Malō. Sa ia fa'aauau e fa'apea, *la outou, ne'i tou fa'alēaogāina se tasi o i latou nei e fa'atauva'a; auā ou te fai atu iā te outou, o a latou agelu i le lagī e lē aunoa ona latou va'ava'i i fofoga o lo'u Tamā o i le lagī....*O le Matai na fa'ailoa atu nei upu i ali'i faifaiva malolosi ma le lapopo'a sa ausia auala fa'alalo nei, e atamamai ma le mimita ma e loto malolosi. Atonu sa ia fa'ailoaina atu o tagata fa'apenei e pei o nei ali'i e le'i ulufale atu i le Malō. E ao ona avea ma tamaiti fa'atauva'a ma fa'atuuatuaaina a le Tamā agalofa. Ina ia malamalamā lelei i latou i nei mea, e masani ona ia talanoa iā i latou e pei o ni tamaiti...*loe, e fa'afetaia lona Tamā ina nanā ia mea i e popoto ma e ata-mamai a ua fa'aalia atu ia mea i tama valevale* (Luka 10: 21). Mo latou uma e totino i le Malo o le Malamalamā e agamalū, fa'atauva'a, ma o ni fanau e alolofa.

O Ai Le Sagato?

O Iesu sa i ai se tinā fa'aletagata ma le tamā mamana. Ae sa iā ia fo'i Iosefo, o se tagata, "o se meaalofa fa'apitoa mai le lagī," na avatu iā Iesu le alofa atoa fa'anatura, le fa'apelepele e tafale e fa'ailoa mai le loto o se tamā (Sagato Ioane Paulo 11). Sa tauave e Iosefo le matafaioi o se tamā fa'aalalo nei mo Iesu, puipuia ma fa'amatulimalu o ia i lona fanau mai ma lona tamaititi, fafaga ma ta'ita'iina o ia e ala i "tausaga natia" o lona olaga.

O le malosi o le matafaioi a Iosefo ma lē na puipuia le Aiga Pa'ia na fa'apea mai ai Pope Pio IX e fa'ailoa o ia o le Sulufaga Pa'ia o le Ekalesia Aoao i le 1870. Talu ai nei na fa'avaeina ai e Pope Faranisisi lana 'au'aunaga o le suli o Peteru i le sua i o lana galuega atoa i lalo o le puipuiga a Iosefo. Na fa'amatala e le Tupusa lona tosiga iā Iosefo o le 'puipuiga' ona o ia e mafai ona fa'alogi i le leo o le Atua ma ta'ita'iina e lona finagalo...E mafai ona ia va'ai toto'a ma le iloa i mea totino, e malamalamā lelei i ona si'osi'omaga, e na te faia fo'i ni fa'ai'uga ma le atamai tele.. Mai iā ia, ua tatou iloa ai pe fa'apefea ona tali atu i le vala'au a le Atua, sauniuni ma le loto atoa.

E pei o Iosefo, o tatou tagata pa'ia o lenei masina o tagata o galuega. A vala'au le Atua, ua latou sauni ma fiafia. Ua latou gaioi ma le tonu e atia'e le Ekalesia ma fa'afou le lalolagi. Ua latou ta'ita'i a latou fanau; ua latou tausi lelei a latou avā. Tatou te fa'afetaia ai mo lo latou molimau.

Fa’ailoa atu le Agagalelei o le Tupu

O le Evagelia Pa’ia o lo’o manino lona folafolaina, o le Alo o le Tagata o le a fa’apopototoina nu’u uma. *E fa’apopototoina fo’i i ona luma o nu’u uma lava; ona tu’u’ese’eseina lea o i latou e ia, e pei o le leoleo mamoe ona tu’u’ese’eseina o mamoe ma’ot. Ona tu’u ai lea e ia o mamoe i lona itū taumatau, a o’ot i lona itū tauagavale. Ona fai atu ai lea ole Tupu i ē i lona itū taumatau, ‘o mai ia o outou ua fa’amanuiaina e lo’u Tamā, ia fai mo outou le tofī o le Malō ua saunia mo outou mai le fa’avaeina o le lalolagi.* O mai outou e alolofa i tagata matitiva ma tagata o nu’u ‘ese. O mai, outou e fa’amalosia lo’u alofa, ona o a’u o le alofa. O mai, outou e fa’asoaina le filemū, ona o a’u o le filemū.

O mai, outou le ‘au fa’apa’iaina a lo’u Tamā, fai mo outou tofi le Malō ua saunia mo outou e le’i avea le ‘oa ma atua, outou na avatu le foa’i i le mativa, fesoasoani i fanau ua leai ni matua ma tinā ua leai ni tane, fa’ainu latou ua fiafeinu, ma mea’ai e fafaga ai latou ua fia ‘a’ai. O mai, outou sa fa’aulufale i le tagata ‘ese, fa’alavalava latou sa telenoa, asiisi i tagata mama’i, fa’amatofanafana i pagotā, ma fesoasoani i le ‘au tauaso. O mai, outou sa tausia le fa’atuatua sa potopoto i falesa, latou sa fa’alogo i a’u Tusitusiga Pa’ia, manana’o i a’u upu, tausi i a’u Tulafono i aso ma po, ma e pei o fitafita lelei e fa’asoia i o’u puapuagatia ona sa outou manana’o e fa’afifia mai a’u, lo otou Tupu i le lag. *O mai, fai mo outou tofi le Malō ua saunia mo outou mai le fa’avaeina o le lalolagi.... Va’ai, o lo’u Malō ua sauni, ua matala parataiso, o lo’u tino e ola e fa’avavau ua fa’aaliala lona matagofie. O mai, outou uma, fai mo outou le Malō ua saunia mo outou mai le fa’avaeina o le lalolagi.....*

Ia olioli e fa’avavau i meaalofa a lo’u Tamā i le lag, ma le Agaga ua sili lona pa’ia e foa’i le ola. O le a se leo e fa’amatatalaina na fa’amanuiaga? E le va’aria e le mata, pe lagona e le taliga, leai se loto fa’atagata e maitauina mea ua saunia e le Atua mo latou e alolofa iā te ia.

Mai Le Koluse i le Mamalu

Ia e fa’afifia mai iā i matou (Salamo 90: 15). Le Ali’i e, o le a le uiga o lenei fa’auptuga? Ia fa’amanino mo a’u le uiga o upu ua e talanoa mai ai, ma fa’amatala ona uiga mo lau ‘au’aura.

Fa’alogo lo’u atali’i. A tou puapuagatia ma fa’atumulia tou loto i le fa’anoanoa, ua tou i le koluse fa’atasi ma lesu, ma a tou maua le filemū iā outou tapua’iga ma fafia e peseina pesepesega pa’ia, ua tou toe tutū fa’atasi ma lesu i fa’afouga o le agaga. Ona fa’atasi ai lea ma le loto olioli o le tou pepese Aleluia, e pei ona toe fa’atuna se tasi mai le oti ma fa’asa’olotoina mai le tu’ugamau.

Ae ui i lea, a to’atutuli o outou tuli vae ma tatalo mo a outou agasala fa’atasi ai ma le salamō tele ma ‘ai’oi mo le fa’amagaloga, ua outou tu’itu’i atu ma le loto fuatiaifo i le faitoto’ole lag. Ae a outou fa’agalo mea uma fa’alalo nei ma metitasio i mea fa’alelagi, fa’atasi ai ma lesu ua outou fa’auau i la outou ala i le lag ina ia fa’atasi ai ma agelu.

Lona uiga po’o le a lava le mea e tupu, pe o le lutia o le tulaga, pe agamalū, agalelei, ma onosa’i – ma o nei mo le alofa o le Atua. Fa’atasi ai ma le onosa’i, ave lou koluse fa’atasi ma lesu, ma oti i aso ta’itasi i luga o le koluse mo lou fa’adolataga e fa’avavau. O puapuagā uma e tau’ave ma le onosa’i i le tino o se vailau lea mole agaga, fa’amatelina mo agasala, ma le fa’amoemoe mo le lumana’i o fa’amanuiaga ma le mamalu. Amene.

E Le Fefe e pei O Ioane le Papatiso

O tagata lelei e leai se mea e mata’u ai i le itulā o le oti. Afai o la e ‘u’uina i lima alofa o le Atua, o ai sē e mafai ona ia se’ia esea i latou mai iā te ia? E moni o le malosi’aga o le pogisa e taumafai e fa’aooso ma osofa’ia e o’o lava i tagata pa’ia i itula o latou oti. Ae e moni fo’i e fa’auau pea ona ofoina mai le fesoasoani a le Atua, ma e fa’atupulia ana kalasia mo ana ‘au’aura fa’atuatua i itulā o le pagatia. E pei ona fai mai le fai Salamo: *e fa’atuatua iā te oe o ē ua iloa lou suafa; auā, le ALI’I e, e te lē tu’uina i latou o ē sa’ili iā te oe* (Salamo 9: 10).

O le ‘au’aura a Elisaia na taia i le fefe ina ua ia iloa atu le ‘a’ai o Totana, ua si’omia e fitafita a le fili. *Auē! Le ALI’I e, pe fa’apefea se mea tatou te fai a’i?* Sa ia fesili atu i le perofeta. Na tali Elisaia: “*Aua e te fefe, auā e to’atele ua iā te i tatou i ē ua iā te i latou*” (2 Tupu 6: 15 – 16). O le mea lea mo Kerisiano ua feagai atu ma le oti. E sau le tiapolo ma fa’aooso i latou, ae o a latou agelu tausi o le a fa’amatolosiu iā i latou. O a latou sulufaga ma latou le ‘au puipui o le a o mai fo’i, fa’apea Sagato Mikaele le Alekagelu o lē na tofia e le Atua e puipui i ana ‘au’aura fa’atuatua i taimi o latou oti. O le Tinā Taupou o Maria o le a sau fo’i e puipua lana fanau e masani ona tatalo atu iā te ia mo se fesoasoani i “ona po nei ma le ituaso o lo matou oti”.

O lona taualugaga lava o lesu lava ia o le a sau e puipua i fa’aooso soga uma lava o i latou e mama po’o mamoe ua salamō o lo latou fa’adolataga na maliu ai o ia i luga o le koluse. O le a ia avatu i ai le loto tele ma le malosi latou te mana’omiaina i lenā tauiviga mulimuli. Tului le loto tele, ua mafai ona fa’apea mai le ‘au Kerisiano: O le ALI’I o lo’u malamalamia ma lo’u olataga: o ai ‘ea se ‘ou te fefe ai? (Salamo 27: 1). Fai mai Origen e sili atu le popole o le Atua mo lo tatou fa’adolataga i lo le tiapolo mo lo tatou fa’aleagaina ona o le Atua e sili atu lona alofa i lo le itā o le tiapolo iā i tatou. E tausi e le Atua ana folafolaga, fai mai ai Sagato Paulo. Ua fa’amaoni le Atua, o lē na te lē tu’uina atu outou i le tofotofoga e sili i se mea ua outou lavātia ai (1 Korinto 10: 13).

I Le Sakalameta ua Tatou Feiloa'i Atu Ai la Keriso Le Fa'aola

Ua fa'aalia e le tusi iā i tatou o le Tama'ita'i ua maitauina lona maulalo ma na fiafia ma le fa'afetai i le anoanoa'i o le alofa o le Atua. E fa'apefea i lenei ona a'afia ai lona tulaga, ona uiga aga'i i le ola?

Sa fai pea lava le tomanatu i lona loto, e pei o le asiasiga a leoleo mamoe po'o le mauaina o Iesu i le Malumalu. Sa ia manatuna-tu i lona loto, ona e le'i silafiaina. Sa fa'atalitali ma le fa'atutaua i le finagalo o le Atua e aunoa ma le fefe, ma na mafai ai ona ia ola ai i le sa'olotoga ma le matagofie..

I Kanana, mo se fa'ata'ita'iga, ina ua fa'aihoa e ia iā Iesu, "Ua leai se uaina," ua tatou va'aia mo ia o tulaga uma ua avea ma talanoaga, o se tatalo. Ma o lana tatalo e masani e fa'amaoni, ona na te le taupulea po'o le a le tali e tatau ona aumai e le Atua. E tatala lava lona tagata i le afio ai ma le maofa e fa'avavau a le Atua.

Ma o se matale atu ma se matagofie sa tatau ona ia te ia e ola ai le misitelio o lona Si'itiaga i le Lagi! E o'o lava i lona a'afia ai i le uia mai o lenei olaga ma aga'i atu i le fa'avavau o se masani o lona fa'atutaua atu i le Tamā ma lana ola foa'i ma le alofa e lē uma mo ia ma vaega uma o lona tagata.

Ia tatou aga'i atu i le misitelio o le sakalameta ma le fa'amoemoe ma le maofa na talia ai ma fa'aafio mai e lo tatou Tinā lona Si'itiaga i le Lagi. Fa'atasi ai ma Maria, ia tatou maofa pea i le fa'aleoa mai pea ni a'afiaga o le Liutino Tagata, ma le alofa lē uma ma le agalelei a le Tamā mo tatou - o tagata.

O Le Malamalama I Ou Ala

O le tala ile fa'ateleina o falaoa ma i'a ua maua i Evagelia, ma na maofa ai le to'atele o le 'au tusi āta, tusi solo, ma le 'au fai telosia i le tele o seneturi. Ua pei o se fa'atusa pa'ia, o fa'aupuga auiliili uma ua i se moni fa'aleagaga. Se'i o tatou va'ava'ai i se tasi o vaega o lenei tala ta'uta'ua.

I le iloa atu o le motu o tagata i se nofoaga tu'ufua a o fa'asolosolo mai le afiafi, na fai atu le 'au so'o, *fai i tagata e o i le 'a'ai e fa'atau ai ni a latou mea 'ai*. Ae o Iesu na sau e pei o se malosi tele e fa'apotopoto, ona o lana misiona o le aumaia lea o tagata iā te ia. O le faia fa'atasi ma le fesoasoami o ana uō, ma talia le itiiti o mea ua mafai ona latou maua , na vala'au Iesu i le motu o tagata e fa'alatalata mai iā te ia ma fafaga iā i latou.

O le 'au agasala, i le tele o augatupulaga e masani ona le amana'iaina tagata fa'atupu fa'alavelave, le au fia 'a'ai, latou e leai ni aiga, tagata o nu'u 'ese, latou e lē talafeagai ma le to'atele. Ae o latou sa mulimuli iā Iesu, latou e fa'apopototo, e ao ona latou aumaia tagata fa'apea e fa'alatalata mai. E tatau ona latou fafaga iā i latou, fa'apaologia i latou i fare, fa'aulufale i latou, ma alofa atu i le foa'iina atu po'o le itiiti iā Iesu – ona matamata lea a o fa'ateleina e le Ali'i a latou meaalofa. Se'i manatu ifo lava pe fia ni 'au'aunaga e 'a'apa atu i le 'au matitiva – Misionare o le Alofa, Le Sosaiete Vincent de Paul ma isi – e masani ona amata i ni faiga meaalofa laiti iā Iesu i le agaga o le fa'atutaua. E 'ese le matagofie ona o le augofie o le Ali'i e fa'ateleina o falaoa ma i'a!

18



Mikaele Teofilo:

m.teofilo@wn.catholic.org.nz
 021 0818 5037

+64 4 496 1707

PO Box 1937, Wellington 6140, New Zealand